

अंक :: अप्रैल-जून, 2022

रज. नं. 31319/77

ISSN : 2320-0995

राजस्थली

भासा, साहित्य, संस्कृति आर लोक चेतना री राजस्थानी तिमाही



सम्पादक
श्याम महर्षि



प्रबन्ध सम्पादक
रवि पुरोहित

लोकचेतना री राजस्थानी तिमाही
राजस्थली

अप्रैल-जून, 2022


बरस : 45

अंक : 3

पूर्णांक : 155

संपादक

श्याम महर्षि



प्रबंध संपादक
रवि पुरोहित

प्रकाशक
मरुभूमि शोध संस्थान

(राष्ट्रभाषा हिन्दी प्रचार समिति, श्रीडुङ्गरगढ़ 331803)

www.rbhpsdungargarh.com

e-mail : rajasthalee@gmail.com



आवरण
रामकिशन अडिग



रेखाचित्राम
रोहित प्रसाद पथिक

ग्राहक शुल्क

पांच साल : 1000 रिपिया, आजीवण : 2500 रिपिया, संरक्षक सदस्य : 5100 रिपिया

Phone Pay / Google Pay / Paytm : 9414416252

इण अंक में

संपादकीय

राजस्थानी री मान्यता सारू कीं न कीं त्याग री जरूरत	श्याम महर्षि	3
कहाणी		
गुवाड़	पूर्ण शर्मा 'पूरण'	4
उत्तर-पातर	सत्यदीप	11
चिंतणदीठ		
बुरा जो देखन...	डॉ. मंगत बादल	20
आलेख		
दूहा-सोरठा छंद मांय राजस्थानी वीर काव्य	डॉ. चेतन स्वामी	26
पाणी बिन मिनख पतबायरो	संग्रामसिंह सोढा	36
संस्मरण		
पाड़ोसण किरायेदारणी	निशान्त	39
कविता		
रई गई रेत ज रेत / कारीगर / मयलो	उपेन्द्र अणु	41
झाड़का / मिनखपणो अर मानखो	भवानीसिंध राठौड़ 'भावुक'	43
किन्ना / टीकल किन्नो	डॉ. गौरीशंकर प्रजापत	45
सात समदरां पार सुं / सांसां रो साच	गीतिका पालावत कविया	47
आवो ! आपां अन्न बचावां / ग्यान री गोठ / गोरी	अरुणा अभय शर्मा	49
गठजोड़े	डॉ. प्रमिला चारण	51
दूहा		
आयो खेत बसंत	योगेश यथार्थ	53
मत कर आतमघात	मोहनसिंह रतनू	54
गजल		
चार गजलां	बनवारी 'खामोश' चूरुवी	55
आंख्यां : तीन गजलां	मोहन पुरी	57
भायला	कल्याण गुर्जर 'कल्याण'	59
हाइकु		
बीस हाइकु	डॉ. अनिता वर्मा	60
दस हाइकु	मोनिका गौड़	62
बाल कविता		
फूल / रोबोट / आमां रो रस / वाणी रो जादू	राजकुमार जैन 'राजन'	63

राजस्थानी री मान्यता सारू कीं न कीं त्याग री जरूरत

अभिव्यक्ति री आजादी सारू मातृभासा रो मुद्रदो सै सूं सिरै है। पण राजस्थानी भासा नै संवैधानिक मान्यता नीं हुवण रै कारण प्रदेस री विधानसभा कै लोकसभा में चुणीज 'र जावण वाळा प्रतिनिधि इण भासा मांय शपथ नीं लेय सकै। शपथ री तो बात ई छोडो, लोकसभा मांय राजस्थान रा पच्चीस सांसदां मांय सूं अेक-दो सांसद जका राजस्थानी री मान्यता सारू बोलता हा, बै ई अबार साव मून धार मेली है।

मातृभासा पेटै राजनीतिक उदासीनता रै इण रवैये री मोटी पीड़ प्रगट हुई है लारलै साल ई पद्मश्री सूं सम्मानित डॉ. अर्जुनसिंह शेखावत रै अंतस। उणां प्रधानमंत्री नै कागद लिख 'र साफ सबदां मांय कैयो है कै जे राजस्थानी भासा नै संविधान री आठवीं अनुसूची में जोड़ 'र मान्यता नीं दिरीजी तो बै आपरो पद्मश्री अलंकरण सरकार नै पाछो सूंप देवैला। आ अेक मोटी बात है। आ अेक संकल्प रै साँगे त्याग री भावना भी है। राजस्थानी री मान्यता सारू औड़ ई त्याग अर संकल्प सारू त्यार रैवण री जरूरत है। हालांकै पुरस्कार तो पैलां ई लोटाइज्या हा। उण बगत मुद्रदो दूजो हो। पण आपरी मातृभासा री मान्यता नै लेय 'र इण भांत री पीड़ पैली बार प्रगटीजी है। कांई राजस्थान रा सांसद पद्मश्री डॉ. अर्जुनसिंह शेखावत री इण बात माथै कीं गौर-गिनर कर 'र मून सूं मुख हुवैला!

जिण भांत राजस्थान विधानसभा सूं राजस्थानी नै मान्यता रो संकल्प प्रस्ताव पास करावण सारू कन्हैयालाल सेठिया मुख्यमंत्री सूं खास अरज करी ही, ऐड़ी ई अरज अर्जुनसिंह शेखावत री इण पीड़ मांय भारत रा प्रधानमंत्री सूं है। आपरै इंटरव्यू में उणां बतायो कै पद्मश्री लेंवती बगत भी उणां प्रधानमंत्री रै आगै आ बात राखी ही, तो उणां कैयो कै हां उण विचार चाल रैयो है। पण इण प्रस्ताव अर विचार नै चालतां तो बरस बीतग्या। भूखो तो धायां पतीजै। राजस्थानी आपरी मान्यता सारू त्याग मांगै अर आपां नै आपरै बूतै मुजब त्याग सारू हमेस त्यार रैवणो चाईजै।

—श्याम महर्षि



पूर्ण शर्मा 'पूरण'

गुवाड़

आ गाम री गुवाड़ है। दड़ींग गाम री दड़ींग गुवाड़। गाम छोटो कोनी पण रळगड है। रळगड रो मतलब जात-पांत सूं नीं, सुवांज-सपतर सूं है। जात नै तो सगळी जातां है अठै। नाई-मोची-लुहार-सुनार आद कारू जात सूं लेय दूजी पड़खाऊ जातां तकात। कीं घर सरदारां रा है अर कीं मुसळमानां रा ई है पण जातां दाँई सुंवाज-सपतर मांय ई अठै सगळा मेल है। केरईयां रै बारै रो पीसो आवै तो केरई आपै पुरखां रै नाणै नै बोच्या बैठच्या है। केरई दिनुगै जावै अर आथण पेट माथै हाथ फेरनै सोय जावै, निधड़क, तो केरई सो कीं हुंवता-सोंवता ई सोवै कोनी। आखी रात तारा गिणबो करै। बिंयास गाम खेतीखड़ हुवै अर बीं रो सुंवाज ई खेती सूं गिणिजै। तो इंयां, ओ गाम ना तो अेन बिरानी है अर ना ई नैहरी। उतरादी सरै नैहरड़ी है अेक। बरसां सूं ई। जकी सूं अेक खाल्यो नीसरै, गाम रै ढींगपाड़। आजकलै उणनै माइनर कैवै सगळा। नैहर अर माइनर रै आसै-पासै मुरब्बै-खंड रै गिड़दाव मांय ठ्यूबेलिया ई है आं दिनां, जका थावर कोनी, फुरबो करै। साल-दो साल मांय तो नीं पण च्यार-पांच साल मुस्कल सूं ई काढै। तछी मांय पाणी तो है कोनी, फुरै नीं तो काँई करै? भराव रो है, धिकै इत्तै धिकावै। पण पाणी फुरै, धणी कोनी फुरै। बो आपरौ मतो कोनी फोरै। ओजूं धकको करै... ओजूं दरड़ो पटै। बखत नीसरै अर ओजूं बो ई फुराव। ओजूं पाणी फुरै... बो ओजूं दरड़ो पटै। ...छाती खोल्यां

राखै, कुदरत रै साम्ही। धक्काखोरो तो है ई बो। धक्को करै जद बीं नै कुहाड़ी री जुरत कोनी हुवै, घण सूं ई काट देवै। धक्कौ करै जद ऊपरलै नै हेठै उतार ल्यावै। हंबै.. करसौ धक्कैखोरो है औन लोहलाठ। भल-भल करती जेठ री लाय मांय धरती रो काळजो चीरतौ बो ऊपरलै साथै पाणी मांडै.. कै लै देख... कित्तोक देख सकै थूं.. कित्तोक पिता सकै थूं..।

औं गाम असल मांय आं धक्काखोरां रो ई है। बस्यौ जद सूं ई। अर आ गाम री गुवाड़ है। खेतां सूं टळ्नै आयेड़ी.. औन खेत-सी। बिन्नै दूर ताँई देखो थे, पीपल अर खेजड़ी ऊभा दीसै.. सिर जोड़यां। बठै सूं अठै इण पाणी री खेल ताँई अर बिन्नै भभूतै सिद्ध म्हाराज रै देवरै सूं इन्नै जोहड़ री पाळ ताँई बीघां मांय पसरेड़ी है आ गुवाड़। पसवाड़े चिपती गळ्यां जाणै गुवाड़ रै बांथ भर राखी हुवै। बांथ मांय भरेड़ी आ गुवाड़ असल मांय पैलां ताल हुंवती। आंधी चालती जद इण री आडी पसरेड़ी देही सूं कांकरा पाटता अर आंधी साथै दूर ताँई रड़बड़ाईजता। बूढिया बतावै कै म्हे टाबर हा जद जूती पैहस्यां आं कांकरा माथै घणा ई रुढ़ता। अेकल-दोकल नीं पूरे गाम रा टाबर भेला हुय जांवता ताल मांय। गोमदो गुदारौ, रळ्डू स्वाईच, हुकमो पंडत, स्योंदो मेघवाळ, आसो नायक अर अलादीन आद सैंग रा सैंग आ भेला हुंवता गुवाड़ मांय। बाकायदै होड लागती रुड़णै री। सैंग अेक सूं अेक चढता खिलाड़ी.. बाजीगर दाँई पून रै रळ्कै सूं पैलां फुरणिया। सगळा आपरी जूतियां रै तळां मांय तिलां रो तेल प्यावंता। तेल प्याअेड़ा तळां नै केर्इ-केर्इ दिनां ताँई घंस-घंसनै चीकणा करता। अर पछै होडाहोड रुढ़ता। अेक रै पछै अेक आंधी रै रळ्कै साथै रुढ़ता खिलाड़ी लैणबंध हुंवता तो किणई रमतियां दाँई लागता। चाबी भरेड़ा रमतिया। रुढ़ता- रुढ़ता केर्इ गोळ घेरियै मांय रेय जांवता तो केर्इ सीधा नीसर जांवता...दूर। लीक सूं पार हुंवतां ई केइयां री दुही टिकती अर केर्इ पूठा मुड़ जांवता। आ ई तो ही बाजीगरी। जकौ पूठौ मुड़नै आपरी ठौड़ साम्ह लेंवतो बो बाजीगर बजतो।

पण अबैं ताल बिस्यो कोनी। ना ई जुवान बिस्या रैया। हां... गुवाड़ बा ई है सागी। अलबत्त तासीर फुरगी। गुवाड़ रै औन दिखणादै पासे ठाकुरजी रो मिंदर हुयग्यौ। जकौ पैलां गाम रै औन बिचालै हो। गऊमुखा घरां रै साम्हीं छूटेडै अेक कूणै मांय, मुसेड़ो-सो। पचासेक साल पैलां गाम कीं बारै खुल्यो तो दीठ ई खुली अर मिंदर री जिग्यां फुरगी। मिंदर अठै गुवाड़ मांय आयग्यौ। मिंदर सूं औन सीध मांय थोड़ी भीतरलै पासै मसीत है। मिंदर बण्यो जद मसीत तो ही ई कोनी। मुसळमान भाई हा। पण घणा घरिया कोनी हा। जका हा बै, ईद-बकरीद नै अठै गुवाड़ रै मुहाण माथै भेला हुय जांवता। नमाज पढता अेक साथै, लंगस मांय। भेली नमाज देखणआळी हुंवती। धोळा-धक्क अेक बरगा गाभा अर अेक बरगी छिब। लंगस मांय सगळां रा डील कदेई अेक साथै ऊभा हुवै अर कदेई अेक साथै हेठै, तो लागै, जाणै कुणई चाबी भरनै छोड़या हुवै। नमाजियां सूं छेड़ै

गाम रा दूजा बासींदा ई हुंवता। नमाज पढ़तां नै देखण खातर। गाम रा टाबर-टिकर ई क्यूं
लुगाई-पताईयां ई आपरै ओलो छिद्दो कस्यां देखती जांवती, “‘मरो अे....मरो अे...’”
मिंदर बण्यां पछै केई साल नीसरग्या पण मसीत रे कोई जिकरो कोनी हो। पण आई साल
जद खळां रै बखत होलै-ठाडै गाम रा बसेवान मुसळमानां कीं चंदो-चिट्ठो भेलो करणो
सरू कस्यो तो गाम रा मौजीज मांणसां नै ठाह लाग्यो। ठाह लाग्यो, कै आं नै ई आपरै
थान-मकाम री जुरत है।

मसीत चिणनै रो जिकर चाल्यो तो जिग्यां री बात आयी। क्यूंकै, गाम रै अगूणै
पासै जठै मुसळमानां रा घरिया है बठै जिग्यां री थुड़ ही। संकता बै बात नै केई दिन तो
मांय ई मांय घोटबो कस्या पण गाम रै मौजीजां नै ठाह हो ही। गाम भेळो हुयो अर अठै
मिंदर सूं अेक पासै कीं भीतर नै लुक्ती जिग्यां मांय मसीत री जिग्यां देवणी तैय हुयगी।

गामै जठै हिंदुआं रा आठ सौ रै नेडै-तेडै घर हा बठै ई मुसळमानां रा घरिया जाबक
ई थोड़ा हा। चूल्हा तो अलबत्त कीं बेसी हुय सकै पण बीसेक गुवाड़ी ई मानो, बस।
मसीत चिणीजी जद छात ताईं पूगतां-पूगतां भैय लागण लाग्यो बां नै। लाग्यो, पार तो
कोनी पडै। गाम रै चौधरियां नै ठाह पड़्यो तो बां बुलायो अर पूछ्यो, “‘म्हे कीं स्हारो लगा
सकां के?’”

पण आ कियां हुय सकै ही।

दूजो आंटो काढीज्यो कै कोटैआळी चीणी मांय आपां सगळा कोटो छोड देवां।
‘गाम री चीणी अर गाम रा ई मिंदर-मसीत।’ फैसलो मानीजग्यो।

सगळा जाणै... बरत्यूं रो आंटो ई हुवै बस। मुसळमानां रो त्यूंहार आवै जद घरां
जको बणै बो तो हिंदुआं रै घरां कोनी पूगाइजै पण सूका चावळ-चीणी तो पूगायां ई सरै।
जात-पांत अर धरम रा आंटा-बळेडां मांयकर ऐड़ा आंटा ई तो हुवै जका मड़कल हुंवता
तासुआं नै ओजूं लट्ठ करै... लोहलट्ठ।

लोहलट्ठ तासुआं रै इण गाम जठै आपरी परापरी नै कीं-कीं ठायी राखी है बठै ई
नूंवै च्यानणै खातर ई बारी खोल्यां राखी है। गामै मिंदर-मसीत अर गऊसावा ई नीं,
अस्पताळ अर इस्कूल ई बरोबर है। छोरा-छोरी भणै-गुणै अठै। हां.. हां, भणै ई है अर
गुणै ई है। जद ई तो गुवांडी गामां मांय जिकरो रैवै इण गाम रो। पैलां तो नीं पण आं ई
सालां मांय टाबर गदागद नौकरी लाग्या है। डागदर, इंजिनियर, फौजी अफसर... ठाह नीं
कुण-कुणसै मैकमां मांय। बूढियां नै नांव ई कोनी आवै सगळा। केई टाबरां तो रळमिळ्नै
सरकारू इमदाद सूं आपरा कामधंधा ई सरू कस्या है। धिनवाद है पुराणती पीढी नै अर
लखदाद है बां री जाम नै, जका पाणी खातर माटी री सील पिछाणै। अगोतर खातर बखत
री नाड़ पिछाणै।

इस्कूल सूं चिपतौ ई खेल मैदान है जठै दिनुगै पैलां कोई जावै अर देखै तो देखतो
ई रेय जावै। बित्ती ई छोरी अर बित्ता ई छोरा। अेक रै पछै अेक लंगस मांय गोळ-गोळ
गिड़दाव रचता रमतिया-सा भाजता टाबरां नै देखणियै री छाती मतै ई चौड़ी हुय जावै।

अर अबै मैदान रै आथुणे पासै भीत सारै लाठी रै ठेगै आपरी ठोड़ी टिकायां जका
आं रमतियां नै ऊभा-ऊभा देख रैया है, बै हुकमो दादो है। ठाकुरजी रै मिंदर रा पुजारी।
उमर लगैटगै अस्सी री हुयरी है। गेडियो कोनी, बोरड़ी री लाठी राखै हरमेस। मूंअंधारै ई
नीसर जावै अर सुरजी ऊगाळी पछै बावड़ै। अबैं बै घूमनै ई आया है। मैदान रै ओछै
चौभीतै ऊपरांकर दूर ताँई देखती बां री निजर स्यात मैदान सूं ई कीं दूर देख रैयी है।
मिचमिची आंख्यां मांय किणी रील दाँई फुरता चितराम थोड़ी ताळ पछै बां रै सवां भरै चेरै
रै पड़्दै माथै ई दीसण लाग्या। सो कीं चडूड़। विगत अर आज बिचालै जको है बो अर
कीं-कीं स्यात आगमियो आंवतो ई। अबार काल ई बां रै पोतै विकास रो सलैक्सन
आरअेअेस मांय हुयो है। घर अचाणचकै ई रंगां सूं भरग्यो, अर घरां सूं बेसी पूरै गाम मांय
रंग-चाव हुयो। आज दिनुगै अखबार मांय फोटू ई छपी ही। इंटरव्यू साथै। हुकमो दादो तो
मोबाइल कोनी राखै पण घरां टाबरां कनै है, सगळां कनै ई। काल दुपारै सूं रिस्तेदारां रा
फोन माथै फोन आवै... बधाई हो...बधाई हुकमाराम जी। अर हुकमै दादै री छाती
कुड़तियै मांय मावै ई कोनी। मावै क्यूकर... मान तो सेंग सूं बेसी बां रो ई बध्यो है। पोतो
किण रो है... हुकमै जी रो। अर हुकमो दादो मांय ई मांय सोचनै चौड़ा हुवै। पोतै विकास
रो ओ दूजो गेड़ो हो...। बो तीन साल पैलां इंटरव्यू मांय रैयग्यो हो। पण आं तीन सालां
मांय बण कोई कसर कोनी छोड़ी। खेत मांय पाणी लगांवती बरियां करसो जियां अेक-
अेक खूड अर डोली संभाल्बो करै, कै कठैई ऊची-नीची जिग्यां नीं रैय जावै... कोई
टेकरी सूकी नीं रैय जावै, औन बियां ई विकास आपरी लारलै गेड़ै छूटेड़ी अेक-अेक चीज
नै बरियां-बरियां जांच ली। बो रोज दिनुगै पैलां आपरै दादै सूं पैलां ई उठ जांवतो अर
कुरब्बो-दांतळ पछै जुट जांवतो पढण नै। पण केरई दिनां सूं बीं नै लाग्यो कै कठैई अड़कांस
है अर बण अेक दिन बा अड़कांस आपरै दादै नै बतायी।

आपरी ठोड़ी नै लाठी माथै टिकायां हुकमो दादो बीं अड़कांस बाबत ई सोचै हा
अर मांय ई मांय मुळ्कै हा। विकास जद कैयो कै दादा आ बात फकत म्हारै माथै ई लागू
कोनी हुवै... आ समस्या तो सगळा पढेसरी टाबरां री है। अेकर-अेकर तो हुकमै दादै नै
बातड़ी न्यावू लागी पण फेर ठाह नीं काँई सोचनै बां हां भरली। दूजै दिन मिंदर माथै
लागेड़ो धत्तू बंद हो। सुरजी दो लाठी चढ आयो पण आज मिंदर रो धत्तू कोनी बाज्यौ।
काँई बात हुयी। दादो कठैई बीमार-सीमार हुयग्या काँई? सोचै बित्ती ई बात। केरई चालनै
मिंदर ताँई आयग्या। पण दादो तो मिंदर मांय ई हा अर पूजा-पाठ रै लाग रैया हा।

सिंझ्या ताँई सगळे हवा फिरगी कै गामै टाबरां री पढाई खोटी हुवै इण खातर मिंदर मांय पूजा बिना धत्तू ई हुयसी । मौजीजां दादै री बात नै समझी, कुण नटै हो । मिंदर रो रेडियो कोनी बाज्यो तो मसीतआलो कियां बाजै हो । अेक नाळखै सूं फूटती फांग न्यारी क्यूकर हुवै ही । दूजै दिन गामगां रै कैयां पैलां ई मसीत सूं धत्तू हेठै उतरग्यो । मिंदर माथै हफ्तै-खंड तो टंग्यौ रैयो पछै हुकमै दादै ई छोरां कनै सूं धत्तू हेठै उतरा लियो ।

आ बात बारहा महीना पुराणी है पण दादो इणनै पुराणी हुवण कोनी देवै । बै रोज दिनुगै बिन्नै गदकालै खेतां कानी घूमनै आवै अर बावडती बरियां डोळी ऊपरांकर मैदान कानी ख्यातै । देखै, फिरकी दाँई भाजता टाबरां कानी । देखबो करै... देखबो करै । देखतां-देखतां कर्देई आपै बाळपणै मांय जा बडै अर कर्देई टाबरां रै भविख मांय । अर इस्यै मांय लाठी रै ठेंगै टिकेडी बां री मुहाळ माथै आंवता-जांवता चितराम देख लेवो भलां ई । साव चडूड दीसै । चालती रील मांय चितराम फुरता जावै, अेक रै पछै अेक । छिनेक मांय ई ठाह नीं कित्ता पल-छिन, कित्ता दिन-महीना, साल टिप जावै आंख्यां साम्हीकर ।

बै आपै संगळ्यां साथै ताल मांय कांकरा साथै तिसळता जा रैया है । पगां मांय तेल चोपडेडी जूत्यां है अर मन मांय हौसलो । हौसलो इत्तो कै बै गोमदै गुदारै अर रळदू स्वाईच नै लाई छोड आया है । आसो नायक तो बां रै लवै-लवास ई कोनी । अलबत्त अलादीन अेक पांवडो लाई रुळ्यां आवै । बां आपरी हिक रो जोर लगायो अर कीं ओर आगै नीसरग्या । आगै नीसरतां ई रील रो चितराम ई नीसरग्यो । अबैं दादो गाम री गुवाड मांय बैठ्या है अर चौफेर बैठ्या है गामगा । गामगा आज सिरापंची मांय नांव काढण खातर भेठा हुया है । सगळां आप-आपरी राय दीवी अर छेकड़ फैसलो ओ हुयो कै चुनाव कोनी करवावां । आपां तो आपणो सरपंच निरविरोध बणायस्यां । सरकार इण खातर आपां नै कीं पीसौ देयसी बो न्यारो । पीसो गामै काम आयसी । अर चितराम ओजूं फुरग्यो ।

मसीत रै गुंबद सूं धत्तू उतारण खातर मकबूल पेडी लगा राखी है अर सारै ई बीं रो दादो अलादीन अर काको सलामुदीन ऊभा है । अलादीन बां कानी देखनै मुळक्यौ है, पडूत्तर मांय बै ई मुळकग्या । बोरडी री लाठी लेयां बै अलादीन रै नेडै पूग्या इत्तै मांय चितराम ओजूं फुरग्यो ।

पूरै गाम मांय ई उच्छब है आज तो । रीट रो रिजल्ट आयो है अर गाम रा दसियां टाबर मास्टर लाग्या है । त्यारी करणिया लगैटरै आधै सूं बेसी लाग्या । घर-घर कढाइया चढ रैया है अर घरां फोन माथै फोन आवै । बधाई हो बधाई । गामै चौफेर मुळक पसर रैयी है । दादै रै होठां माथै ई । मुळक कीं आगै पसरी अर पसरती ई गई । आज विकास... बां रै लाडेसर पोतै रो आरअेस रो रिजल्ट आयो है । बो ऊंचा नंबरां सूं पास हुयो है । रिजल्ट आयां सूं लेय अबार दूजो दिन हुयग्यो बां रै घरां फोनां रो अर माणसां रो तांतो ई कोनी टूटै ।

बारै बैठक मांय गाम भेलो हुयस्यौ है। काल टेलिविजनआव्हा ई आया हा अर अखबारआव्हा ई। पोतै रो इंटरव्यू लियो तो दादै नै रळाय लियौ साथै। पोतै जद दादै नै साथै लेय फोटू खिंचवाई तो हुकमो दादो कीं तणनै और ऊंचा हुयग्या। दिनुगै अखबार मांय विकास री फोटू साथै ई आयी बां री फोटू।

बै अखबार मांय छपेडी आपरी फोटू नै देख रैया है। फोटू रै होठां माथै तिसळती मुळक थिर हुयगी है.... बां रै हरमेस मुळकतै होठां दाईं। बै कई ताळ ताईं अखबार री फोटू मांय बड़या रैया। पछै बां री निजर तिसळगी। बां री फोटू रै अड़ोअड़ दूजी फोटूआं ही... ऐक बरगा गाभां मांय कड़च्च फोटुआं। ऐक-दो स्हैरां री फोटुआं नीं, केर्ई स्हैरां री फोटुआं। पण.. सगळी री सगळी ऐक बरगी। लाल-केसरिया गाभां मांय कस्या-कसाया जुवानां री फोटुआं। अधबाहिया पैहस्यां का पछै धोतियै माथै जनेऊ धार्यां जुवानां री फोटुआं, तेल चोपडेड़ा डीलां री फोटुआं, त्रिपुंड मसळेड़ा तिलाड़ां री फोटुआं। हाथां मांय नागी तलवार... बरछा... लाठी अर भाला।छोटियो पोतो फोटुआं साथै समचार बांचनै सुणावै हो। गुवाड़ रै चौक माथै बैठ्या गोमदो, अलादीन अर हुकमो दादो समचार सुण्यां जावै हा... सुण्यां जावै हा। रील चालै ही.. लगोलग अर अबैं रील मांय अखबार री जिग्यां टेलिविजन लेय ली। बै ई सागी चौपडेड़ा डील आपरी नागी तलवारां नै हाथां मांय लेयां लैण सूं लैण जोड़यां चौगड़दै पसरता जाय रैया हा। हजारूं लोगां रो टोळ मिंदरां सूं सरू हुयो अर स्हैर री गळी-गळी मांय पसरतो गयो। छिनेक मांय टोळ जाणै समद बणगयो... लाल-केसरियै पाणी रो छोळां हुयेड़ो समद। सगळा बतलायेड़ा हुवै जाणै। पांवडै-पांवडै औन सागी बिस्या ई बूकिया कसेड़ा जुवान त्यार लाधै। “...धरम री जै९... भगवान.... री जै९९ ..”, जैकारा लागै अर समद रो पाणी कीं और पसर जावै। स्हैर री भीतरली गळियां... लाल लीक रै भीतर बसेड़ी बसास्त! समद रो पाणी अबैं इण बसास्त मांय बड़गयो... छोळांछोळ... अड़ड़... अरड़ड़... ड़ड़! पाणी हिंदुआं रै घरां नै छेकतो मुसळमानां रै घरां ताईं जा पूर्यो। बंद बारणा रळबड़ाइज्या... खुला दुराजा भेड़ीज्या पण पाणी तो पाणी हुवै। पाणी अर आग रै जोर रो काईं मापीणो। अणमाप अर अणथाग जोर! घरां मांयकर छेरां हुंवतो पाणी मसीत री पेड़ियां साम्ही जा लाग्यो। ओह! छिनेक मांय मसीत रै बारणै साम्ही जाणै आखो समद ई भेलो हुयग्यो। गळी मांय ..हेठै तळी सूं लेय ऊपर मसीत रै गुंबद ताईं। पाणी गुंबद रै नुग्गै ताईं जा पूर्यो अर अजान देंवतो धतू ऐक छिन मांय समद मांय डूबग्यो। अबैं बठै मसीत ही, अजान कोनी। जैकारां हा, का पछै हडमान चाळीसो हो.... अखंड हडमान चाळीसो। अजान री गूंज जिती दूर ताईं जावै ही उण सूं बत्ती जावै ही अबैं हडमान चाळीसै री गूंज। गूंज इब मीट करती सरकार रै कानां ताईं पूर्गी अर बण कान खड़खड़ाया। दफतरां री घंटियां बाजी। मोबाइल कानां रै चिप्या

अर देखतां ई देखतां लाल अर केसरिया रंग साथै समद मायं अेक और रंग आ रळ्यो । खाकी रंग ।


राज रा अेलकार आया, पुलिस आयी तो दूजै पासै ई कीं सलफळाट हुयी । नस तणी, फळबंट हुयी अर खाकी रंग साथै-साथै धोळे रंग ई आ घुक्यो । रातो समद अबैं इकरंगो नीं बिदरंग हुयग्यो ।

“धतू मसीत सूं उतस्यो है तो मिंदर सूं ई उतारस्यां... ।” बात तो बात हुवै । बात नीं तो बेबाई ई हुवै । बात उछळै तो भाठा दाईं उछळै । पण जद अेक भाठो उछळै तो पछै रा भाठां री गिणती कोनी हुवै । भाठा बाहिज्या... अेक.. दो..तीन.. ठाह नीं कित्ता... । हुकमै दादै सूं गिणज्या कोनी । गिणतां-गिणतां बै धूजण लाग्या ।

हुकमो दादो लाठी रै ठेगै ठोडी टिकायां ऊभा हा पण बां सूं ऊभो कोनी रैयिज्यो, लाग्यो, आखै डील री रूंआड़ी चिपगी जाणै । लोथ हुंवतो बां रो डील इब पड़सी..इब पड़सी । उतावळी-सी बां आपैरे पगां नै आगै-लारै कस्या अर कीं सावचेत हुवण री कोसिस करी । इत्तै मायं लारै पग घींसता सुणीज्या ।

बां लारै मुड़नै ख्यांत्यो । कोई कोनी हो । बैम हुयग्यो इयां ई । बै मुळक्या पण मुळक सांचरी कोनी अर आमण-दुमण-सा गाम कानी टुर लिया । चौर्भीतै री कूंट पार करी तो देख्यो, साम्हीं खुलती गुवाड़ मायं मसीत अर मिंदर री धवळी देही दिनुगै री कंवळी तावड़ी मायं दिप-दिप करै ही । बां रै होठां टुटेड़ी-सी मुळक सरक आयी ।

◆◆





सत्यदीप

उतर-पातर

दिन भुंवीजता बतूलिया हुवै। भूरजी दो कम सित्तर रै अेडै -गेडै पूग परा बिसाई लेवै, कै बिसाई बानै झालणै री जुगत बिठावै। दोन्यूं बात ई अेक-दूजी नै सांभै।

भूरजी जंगलात मैकमै मैं बाबू हा, पण रैवण-सैवण अर ठरको अफसरां सूं ई बत्तो हो। क्यूंकै जठै बै हा बो उजाड़ इलाको हो तो अफसर बापड़ा के खोदै अर के बूरै! भूरजी री बाबूगिरी हेटै च्यार बागवान, आठ चौकीदार अर दो चपरासी। अब भूरजी जाणै फोगलै सूं घिंट्याळ ई हा। आछी मजूरी रो सरंजाम भी हो। पण बात है उतर-पातर होवणै री।

आ कहाणी कीं अलायदी है। राज रै काज नैं छोड़ेर जद भूरजी री अबार कूंत करां तो अेक नूंवो भाव दरसावै। रिटायर हुयां पछै जद गांव आया भूरजी तो अेक अजब-सो खिंचाव उणां रै मूँढै माथै हो। म्हारै साथै भूरजी आपरै जी री गुरबत कर बफारो काढ लेंवता हा। बियां बै बतरसिया हा। आ आदत बानै बांग दादा सूं मिल्योड़ी ही। भूरजी रा दादा गांव में हथाईदार अर बातपोशी रा गारदू बाजता। तो ठाला भूरजी दो काम पोळाया हा, अेक तो खाली पड़त री जर्मीं पर रुंख लगाणा अर दूजा आपरी बैठक में हथाई रो हेत गाळणो। म्हनै भूरजी आपरो खास मानता हा। सीधो हेलो पैलपोत म्हनै ईज लागतो। म्हें भी अडीक राखतो हो उणां रै हेलै री। म्हारी जोड़ायत सदां ई म्हनै हंसती ही—“रुं-रुं टूटै है

भूरजी रै हेलै तांई थांग। इसी के घोळ'र पाय दी थाँनै कै सिंझ्यां हुयी नीं कै थे तकावणो सरू कर देवो उणां रै हेलै कानी।” म्हँ पडूतर के देवै हो! बस मुळक'र चुप खांची राखतो। बस बियां कोई हुवो, आपरी घरआळी री बात पर चुप रैवै बो चोपड़ी जीम'र सौरा दिन काढ सकै। नींतर झींका बै बाजै कै राम टाळै! खैर, आं बातां में के धरियो है, आपां पाढा मुड़ां भूरजी पासी। आज भूरजी अजै धुंई जगती को करी ही नीं।

म्हँ सोच्यो, आज म्हांटी इयां-कियां हुई? सदां तो भूरजी दो-तीन हेला कर दिया करै। आज म्हँ ई उफत्योड़ो हेलो कर लियो, “कियां भूरजी... आज मोड़ो कर दियो, धुंई-धपड़कै में।”

हेलो सुण'र भूरजी बारै आय बोल्या, “के बतावां बाऊजी, आज गुरांसा रो दिन हो तो, बां रै पूजापाठ कर जोत सारू धूपिया जचावै हो, पछै जोत कर'र सलटाई इत्तै थे जाणो हो, बगत तो म्हांटो लागै ई है। खैर, अबै पगलिया करल्यो, के परलै हुवै है?” भूरजी आपरी आदत मुजब बात नै ठरको दियो, “देखो बाऊजी, ‘रात हुयां पछै मोड़ो कोनी अर उधार मिलै जित्तै फोड़ो कोनी’। अब आयल्यो करां धुंई सेंचन्नण, गुल्लो अर गुमानो भी इत्तै नै आया रैसी!”

खैर, पगां में चपलड़ी घाल'र म्हँ टुर लियो। पाछै सूं सुषमा, म्हारी जोड़ायत टुणकलो न्हाख ही दियो, “ल्यो, खदबदै ही खिचड़ी हारै में, अब देसी ठंडा छांटा बापड़ा! बुझग्या पित-पाणी बापजी रो हेलो सुणतां ही।”

म्हँ के कैवै हो, बोलबालो नीची नाड़ कर'र टुर ब्हीर हुयो।

भूरजी बाखळ में लकड़ी छाणा जचावै हा धुंई में अर कोई निरगुणी संत री बाणी उगेर राखी ही—

मिनख जमारो बंदा ओळ्यो मती जाण दै,
सुकरथ करलै जमारै नैं।
पापियां रै मूढै सूं राम कोनी निसरै,
केसर ढुळ रैयी गारै में।
माणक मोती मिलिया मूरख नैं,
दल्बा लाग्या सारै नैं।
हीरां री परख तो जाणै जंवरी,
काई ठा मूरख गिंवारै नैं।
गुरु इमरत अमर भया जोगी,
जार लियो काचै पारै नैं।
भूरियो भजन हरि नांव रो करसी,

हरि मिलसी दसवें द्वारे में।

भूरजी आपरी झीणी रागणी सूं बाणी गावै हा, म्हैं बड़तो ई बोल्यो, “वा सा भूरजी, के राग है, के बोल है!”

“ना ओ बाऊजी, क्यांरी राग’र क्यांरा बोल। गुरांसा रा बोल है, चितार लेवां कदै-कदास। थे सुणावो बाऊजी, के हुय रैयो है अबार?” बै जाणै हा, म्हैं कहाणी कविता लिख्या करूं।

“के बतावूं भूरजी, ओक कहाणी लिख्यां ही पण कीं पर लिखूं, समझ में ई को आवै नीं।”

“समझ में के आसी बाऊजी! थे तो भूंगळ रा घेसळा मारो हो, कहाणी के हुवै थानै के ठाह! थे तो सुणो आ कहाणी—कहाणी कै है मांयली पीड़ जद उमटै तो आंख झऱै, आंख झऱै तो पीड़ परगटै। पीड़ ई कहाणी बणै बाऊजी।”

इत्ते में गुल्लो जी, गुमानो जी भी आय लिया हा। धुंई भी आछी तरियां जगरै चढ़गी ही। रामा-स्यामा कर’र बिछ्योड़ी बोरियां माथै टिकग्या हा। बैठ्यां पछै म्हैं पाछा भूरजी नैं कुचर लिया कै पीड़ आळी कहाणी किसी हुवै। थे ईज फरमा देवो बापजी!

भूरजी करड़ो खंखारो कर’र बोलणो पोळायो तो कद कहाणी बणगी, आ तो कागद पर उतरी तद ई ठाह लाग्यो। तो भूरजी कथी ही आ उतर-पातर। उतर-पातर ई मांयली पीड़ है। भूरजी बोलै हा अर म्हैं सुणै हो, गुणै हो।

भूरजी सरू करी आपरी बात—

“बाऊजी, थे तो जाम्या हा कै नई, पण म्हैं पढाई पूरी कर’र खल्ला फाड़तो फिरै हो। मसखरै टाइप में बोलणो, अखाणा री लाग्योड़ी घूंटी सूं सामलै नैं हंसी रा सबड़का दिराणै में आछी पकड़ ही। दोपारां पनजी पनवाड़ी री दुकान बैठ’र ठरका देंवतो हो तो दिन दसेक पछै जंगवात मैकमै रा अफसर भी बठै पान खावणै सारू आंवता हा। ठाह कोनी बां रै म्हैं जच्यो कै म्हारी बातां रा लसरका। ओक दिन म्हनै पूछ लियो, ‘यार, तूं तो जोरको मजेदार मिनख है। के करै है?’ म्हैं बोल्यो, ‘बापू होटल में जीम’र गाभा अर लीतर फाड़ लेवां और ठाला बैठ्या करां ही के?’ बै बोल्या, ‘ठाला क्यूं बैठ्या हो, कीं काम करल्यो।’ म्हैं कैयो, ‘काम तो के करां, पढ लिया तो खेती सूं छींक्या आवै, बाणियै रै जावां तो खाल कढै। कोई सरकारी नौकरड़ी री ताबै लागै तो देखां।’ मजाक-सी करतो म्हैं म्हारी बातड़ी सिरका दी। पनजी स्हारो लगायो, ‘साहब, ऐ भूरजी आदमी तो सळिया है। थे कोई कामड़े री ढब बिठावो नीं। थांरो हाथ तो थांरै मैकमै में ठाडो-ठावो है।’ बै बोल्या, ‘हूँड सौच सूं देखां काईं ताबै लागै।’ बात बाऊजी, आई गई-सी हुयगी ही। म्हैं किसो भरोसो करै हो। रात गई बात गई सी मान बै ई बैंगण अर बा ईज छाछ करतो दिन

टपावै हो। तो बाऊजी अेक दिन बै आया हा, आपणाराम बियां ई पनजी री दुकान माथै बातां रा ठरका देवै हा। बै म्हनै कैयो, ‘भूराजी, थांरी पढाई रा कागदिया तो म्हनै दिया।’ म्हैं पूछ्यो, ‘कद?’ बै बोल्या, ‘काल इत्यारां ई म्हनै दे दिया। बख में बातडी लखावै है, अठै जंगलात रो छोटो दफ्तर पंदरैक दिन रै मांय-मांय खुलसी, लागै सांवरियो साथ दियो तो थांरो नाको लाग ज्यासी।’ मिनकी रै भाग छाबड़ियो-सो लाध लियो हो। म्हैं आगलै दिन म्हारा पढाई रा कागद बानै पकड़ाया अर घरां आय’र मां नैं बतायो तो बा अणूती राजी हुई। इक्यावन रिपियां री परसादी भी कुळदेवता रै चढाई ही।

“दिन दसेक पछै बै साब आया अर म्हनै पान री दुकान पर मिलग्या। मिलतां ई कैय दियो कै थांरी परख है भूराजी, कालै टेसण सारै री धरमसाळ में दफ्तर रो जाचो जचायो है। थानै काम संभाळणो है। म्हारै तो बाऊजी, आछी ताबै लागगी। जाणै मालक पनवाडे-सो ई पुरस दियो हो। आगलै दिन म्हैं बीं दफ्तर, मां रै पगां लाग, देई-देवतां नैं धोक देय’र बगतसर पूग लियो हो। काम बै समझा दियो हो, दो रजिस्टर अर अेक टाइपराइटर रो धणियाप भी दे दियो हो। तो बाऊजी, संकटियां रा संकट सांवरै री महर सूं कट्या।

“अठै काम तो सरू हुयो को हो नीं, बस दफ्तर थरपीज्यो ईज हो। पण ध्यानगी सरू ही, तो आपणां के कांटां में हाथ जावै हा। दो महीनां पछै अठै रा अम.अल.ओ. खुद आया हा तो बै काम री जुगत ई ल्याया हा। अेक पूरो बीड़ रो हिस्सो जंगलात मैकमै रै हेटै कर उणमें धोरा बांधणै अर रूंख लगाणै रो काम हो। साब अर अम.अल.ओ. साब आपसरी में के गुरबत करी बा तो ठाह को लागी नीं पण दोन्यूं मुळकता बारै गया हा। आपणै के लेवणो! आपां तो काम नैं जतन सूं करां, आ ईज जी में धार काम करणो पोळायो।

“काम सरू हुयो तो केई भांत रा रजिस्टर आया हा। खेबी तो अब हुवणी ही। काम री मंजूरी आई तो दफ्तर में आदमी और बधाया हा पण हा म्हारै सिरखा सिफारसिया ईज। अेक नाजम साब रो भतीजो, अेक साब रो भाणजो अर दो अम.अल.ओ. साब रा जाणीकार। न्यारा-न्यारा काम हा। अेक तो जूनी झाड़-झाड़क्यां काटणी, दूजी पड़ालां पर पाळ बांधणी अर नूंवा रूंख लगावणा। सगळा कामां रा ठेका हुवणा हा, तो केई ठेकेदार मेह रा बधाऊड़ा-सा भूंवै हा। साब जाणै अर साब रो काम, आपां नै के लेवणो हो बाऊजी। आपां तो दफ्तर रो काम सांभणै री भोळावण ली ही। बो बगतसर पूरो कर देंवता हा। कोई ओळमो नीं मिलै, इण बात रो पूरो ध्यान राखतो हो। ठेकेदार जद भी कोई बात जाणनी चांवता, म्हैं बिना लाग-लपेट बानै बता देंवतो। किणनै ई कोई सिकायत म्हासूं को ही नीं। पण अबखाई तो काम रै बाद हफ्तो चुकारै रै दिन आयी। उण दिन भीड़ ही मजूरां री। जका ठेका पास हुया हा, बै ठेकेदार भी हा। उण दिन अेक और मिनख आयो हो अर साब

कनै बैठ्यो हो । बो ठाडी तावळ मचा राखी ही । साब भी आप फणां-तणां हुय मेल्या हा । बात रो सार बाऊजी ओ हो कै म्हरै भी झोबा आवै हा । म्हँ बै सगळा कागद जचा'र बिल बणाय साब कनै लेयग्यो । साब बिल पास कर'र भुगतान रा चेक बणाया अर ठेकेदारां नै सूपै हा । पछै बै म्हनै अेक कागद और दियो अर बिल बणाणे रो कैयो । म्हँ इचरज सूं बां कानी जोयो तो बै बोल्या, 'भूराजी, बणा ल्यावो, म्हँ कैवूं हूं नीं थानै ।' बिल तो खैर बणाणो ई हो बाऊजी, बणा ल्यायो । साब उणनै भी पास कर दियो अर चेक बीं आयोडै मिनख नैं सूंप दियो । बो घंटा भर में बैंक सूं पीसा भी लेय आयो । सिंझ्या हुयगी ही । दफ्तर आज बगत सूं दो घंटा लेट बंद हुयो हो । म्हँ म्हारा कागजिया संभाळ जचावो हो कै जितै नाजम साब रो भतीजो आयो अर म्हरै साम्हीं दो सौ रिपिया राख्या अर लेवणे रो कैयो तो म्हँ साव नटग्यो हो । बो पाछो जाय'र साब नै बतायो । साब म्हनै बुलायो तो म्हँ गयो बाऊजी । साब म्हनै बुला'र समझायो, 'भूरजी, थे औं पीसा लिया कोनी ।' म्हँ कैयो, 'हां साब, औं के तोजो है ?' बै बोल्या, 'भूरजी, थानै ठाह है कै बोरिया सूं लड़ालूम झाड़की बढै जद बोरिया नीचै खिंडै है, बांनै कोई नीं सौरै तो रेत में रळ रेत बणे उणसूं पैल्यां कोछै में घाल लेवणो ई समझदारी हुवै कै नीं ? पछै कोई और चुगै कै रेत बणे उणसूं आछो है चुग'र झोळी में घालल्यो । आपां पाछ राखां तो मूरख बाजां । ल्यो, राखल्यो म्हँ कैवूं हूं नीं थानै । ओ तोतक तो चालसी ।' बाऊजी, बै रिपिया धूजतै हाथां म्हँ झाल लिया हा । साब म्हां साम्हीं देख'र हड्हड़ हांस्या हा । तो बा ल्याळ उण दिन नीं चांवतां ई लागगी ही । नौकरड़ी करणी ही अर कीं अलायदी रो आवणो इसो गंडक आळो हाड बण्यो कै राफ्यां में चसड़-चसड़ खून खुद रो ईज लागै हो ।"

धुंई चट-चट सिलगै ही अर बात्यां रा लसरका भूरजी रा दड़ाछंट चालै हा । भूरजी री बात बताणै रो ढंग ई इसो हो कै जाणै कोई कथा बांचणिया महाराज मीठे बोलां भागवत बांचता हुवै । कथा ज्यूं-ज्यूं आगै बधै ही, रस आवै हो । म्हे तीनूं जणा कान धोबा-सा मांड्या सुणै हा ।

भूरजी आगै बोल्या, "तो भाई कानसा, अब ढूब्यै नै तीन बांस, साब रो समझाणो अर सागलां रो अेक सुर, म्हँ भी बीं बैंवती बेतरणी में गावड़ी री पूँछ झालली ही । धीरै-धीरै ध्यानगी पर लागी नौकरड़ी भी पक्की बणगी ही । तीन साल पछै अेक दिन साब पूरे दफ्तर में काम करणियां नै बुलाया । बै बतायो कै अब औं दफ्तर छोटो दफ्तर हुयग्यो है, अठै सूं म्हनै जिला दफ्तर में जावणो पड़सी । अठै बाबू अेक ई रैवणो है, तो बतावो कुण अठै रैयसी ? अबार म्हँ कोसिस कर'र थानै अेडजस्ट करवा सकूं हूं । नाजम साब रो भतीजो अर अेम.अेल.ओ. साब रो भाणजो बांनै जिला दफ्तर में लगाणै सारू कैय दियो । अेम.अेल.ओ. साब रो भतीजो कोई और पूग सूं कोपरेटिव बैंक में नौकरड़ी रो जाचो जचा लियो हो । पण म्हारा राम री घर री गाडली सावळ तनखा अर दो पीसा अलायदा मिलणै

सूं जबरी चालै लागी ही अर धाको सावळ धिकै हो । म्हनै और तोजै री कोई चांवना ई कोनी, सो म्हैं साब नै अठै ईज जापड़-तापड़ करणै रो कैय दियो हो । अेक म्हैं अर अेक और बाबू, दो चौकीदार अर दो बागवानां सारू हो औ जंगलात रो दफ्तर । अफसर बैठै जिला दफ्तर मांय अर गोडैसूंगो राज अठै हो म्हारो बाऊजी, सो रायकण डाकण जाणै उंट चढी । कोई कैवणियो न कोई सुणणियो ! ‘आंधै री सीरणी अर मुड़-मुड़’र भरै गूँझिया खुद रा’ । ल्याळ जकी लागी बाऊजी, तो हक सारू हांती सगळां री । जाणै हो बाऊजी, दापै रो धन अर ऊपरली आंवत बांट-बांट खावै बो बैकुंठा ई पावै । म्हारा गुरु हा म्हारा पैलड़ा साब, सो म्हैं म्हारै काळजै आ बात गांठ बांधली ही । बियां अेक गुरुमंतर और हो, पढती बगत हिंदी आज्ञा मास्टरजी बतायो हो कै जे सुख सूं जीणो जगत में तो बगनो बण कै जी । जाणो चायै सिस्टी रो ग्यान, पण अफसर साम्हीं रैवो अणजाण ।

लला चपी लाडली, करी राख हरमेस ।

बो नर तो ठेकै नहीं, फिरल्यो आखै देस ।

तो बाऊजी, आपणी पावली आं मंतरां री पाण पूरी पांचाना में पळकती ही ।”

बातां रै चालतै लोरां री झीणी फुवारां झिरमिरै ही कै धुंई कजळाईजण लागणी ही । गुमान जी बोल्या, “भूरजी, बातां रा भतुळिया धुंई री ओग ई उपाड़ली लागै ।”

“हां सा, बातां-बातां में ठाह ई को लाग्यो नीं सा—बगत अर बास्तै रो । खैर सायरां साची कैयी है—

बातड़ल्यां घर ऊजड़ै, चूल्है दाळद आय ।

पण जे जाणै बातड़ी, ऊजड़िया बस जाय ।”

भूरजी खेजड़ी रा दो छडा अर च्यार छाणा धुंई रै मूँढै में राळ्या, तो पाढो बासती सैंपूरको अर बात रो झिलोरो पाढो ।

भूरजी री बातां सूं अेक तो आ लखावै ही कै चोर मिनख हुवै कोनी । बगत रा फटकारा ईज उणनैं चोर बणावै अर दूजी आ कै भूण पर पाणी काढणै सारू बगतै रङ्डू नै घिसणो ई पड़ै । नीं चांवतां ई भूरजी सिस्टम रै करोसियां सूं उळझायै सूत री जाळी बणग्या हा । भूरजी बात आगै टोरी । बोल्या, “बाऊजी, कोनी जी में ही पण म्हनै समझ में आयगी ही कै जे सिस्टम सूं बाथेड़े कर लियो तो दूध में पड़ी माखी-सो अलायदो फेंक पसवाड़े कर दियो जासूं कै गोयरै नै जियां सोटां सूं सलटाईजै, बा गत हुयां सरसी । अब सीरो खायर जाड़ घिसाणै री ई धारली ही । जीमो-कमावो, खावो-खुवावो रै सिद्धांत साथै थाळी पुरसी राबड़ी रै सबड़कां रो सीर । राज अर राज रा खाड़ीती विकास रा भरोटिया बांधै हा, तो खिंड्योड़ी लकड़ी रा भारा डोळ सारू अबै म्हैं ई बणावै लाग्यो । हां, म्हैं स्याणो इत्तो जरूर हो कै हांपळा को मार्या नीं । सौरप में हाथ लाग्या बठै ई संतोख कर लियो । इण

बिचालै काम सालूंसाल मोकळा आया। बै ईज रुंख लगावो, मेडां बांधो। बाऊजी, आछी-भली गोचर मांय तारबंधी कर 'र सफेदा अर कीकर लगा'र जर्मी जाणै बांझड़ी कर दीन्ही ही। आपणा फोग, सींवण, बूर अर कुमटिया रा भरचक बुला दिया हा। झाड़क्यां झड़े'र जुगती सूं पीसो बण मोटा औलकारां री हेल्यां सारू काम आई तो झूंपडत्यां रै दड़को म्हैं ई देवणै में डोळ सारू पाछ को राखी ही नीं। दफ्तर चालतो रैयो, बिगसाव हुंवतो रैयो। आखी रोही कीकरां सूं लड़ालूम। डांगर भलाई भूखा मरो, खेतां में उजाड़ करो। न कोई कैवणियो, न सुणणियो। पैपाबाई री कचैड़ी! लेखा लिखीजै, सौदा पटीजै। 'तूं ना कैयी म्हारी, तो क्यूं म्हैं कैस्यूं थारी' रै नांव जिकी बांदरबांट आखै मुलक में बगै ही तो कीड़ी बरगो दफ्तर भी बगती गंगा सूं नहर काढे'र पाणी उल्लींचणै में संको कर 'र कसर थोड़ी राखतो। बाऊजी, अफसर आंवता रैया, जांवता रैया। भूरजी बना छौ जाणता रग। आंवतो अफसर साच अर ईमानदारी रो जाडो दही जमावतो तो समझ में झट आंवती ही कै अबकै पांती आपणी कम अर बांरी पूरी। पण जी धपायो राखता कै किसा तिल तोल्या हा, रावळै रो तेल पल्लै में ई चोखो। आपणै के घाटो, पल्लो चीकणो ई सही। सावळ अफसर हुंवतो तो चुगै सीर सगळै कबूतरां रो सवायो।"

भूरजी री बातां में रस-सो बरसै हो। म्हे तीनूं बूक मांड गुटकै-गुटकै पीवै हा भूरजी री बातां रो रस। भूरजी कथै हा—

"तो बाऊजी, अैकै ठौड़ चालती नौकरड़ी नैं बिना बात ई चाक लागगी ही अेकरसी। पतो नीं कोई सिकायत घाल दी ही अर कोई ऊपर उणरो तकड़ो जाणीकार हो, सो म्हांनै बैरी बदली करा'र टिका दिया बांसवाडै। अबढी पजी ही बाऊजी, कदै किणरो बुरो को कर्घो हो नीं पण किसै भो री भुगतावण हुई ही, सांवरो जाणै! खैर, तिकड़म भिड़ा'र पूण-पावलो खरच 'र बा बदली पाढी गांव तो करा ली ही, पण बाऊजी, अब ठाह भी लागयो हो कै आभो खाली टोखसी बरगो ई को हुवै नीं, सोच सूं परै बत्तो ठाडो हुवै। पाढा आयां पठै सेहळै री गळाई गिंडी बण जीवणो ई सार समझ 'र बोलबाला हुय लिया हा, पण मजूरी में जोड़-तोड़ बणाय 'र छेती नीं पड़नै री जुगत तो जमाई राखी। पण घेर मोडियो जद आयो तो बाऊजी थल्ला हालग्या हा। सिंघ नै झाल्यो स्याळियो जे छोडै तो खाय, सिंघां गाबड़ सांवठी सांभी नई संभाय। तो बाऊजी हुई आ कै जीणै सूं ई जी धापग्यो हो।

"दोपारै बारै कुरसी घाल 'र बैठ्या गप मारै हा। बागवान म्हारी बात रा हंकारा देवै हा अर म्हैं म्हारा लपोसड़ा छाटै हो कै चपरासी हेलो कर दियो, 'बाबूजी, फोन।' म्हैं भाज 'र फोन उठायो। जिलै रै दफ्तर सूं अठै रा इंचारज बोलै हा, 'भूरजी, बुधवार रा जयपुर सूं बडै अफसरां रो दोरो है, आपणै दफ्तर ठैर 'र चैकिंग करसी अर जीमा-जूठो कर 'र आगै जिलै रै दफ्तर पूगसी। बां सारू खोखा खाणा अर कंवळा खजूरां री तिस्स


मेटण री बैवस्था करणी भोत जरुरी है। म्हैं जाणूँ हूँ कै थाँरै बस रो सौदो कोनी ओ। म्हैं काल आवूँ हूँ। थे पीसड़ां रो पूरो सरंजाम राख्या। पूरती री बाद में देख करस्यां।' बाऊजी, फणां-तणां हुयरै पूरो दफ्तर लागग्यो हो जाचो जचावण में। आगलै दिन इंचारज साब आलिया हा। म्हैं बानै पीसड़ा री भरोटी संभळा दी ही। आगलै दिन बुधवार हो, जयपुर सूँ चाल्या अफसर गेलै रा दफ्तर छेकता ढाईयेक बजै-सी पूग लिया हा। म्हारा साब अर म्हे सगळा दफ्तर आवा तरधन सेवा में कमर दोवड़ी कररै हाथ जोड़यां खसै हा। बांरो तोरो उतरतां ई खईस बरगो लखावै हो। साथै अफसरां रा मैडम भी हा। म्हारला साब नैं अफसरां री सेवा-चाकरी में लगा आपां तो पल्लो झाल्यो मैडम रो। मैम साब रै इसारै नैं बोल्यां पैली समझ सगळी सेवा बां साम्हीं हाजर-नाजर। अणूता राजी हा मैम साब। ओ गुर हो म्हारै भेजै में कै लुगाई जद राजी हुवै तो कोई खिंख्या को हुवै नीं। बाकी घोड़े खावो घोड़ैरै धणी नैं। जीमण रा खोखा अर खजूरी पाणी री बैवस्था साब कियां करी ही बै जाणै, बांरो काम जाणै। आपां रामजी तो मैम साब रै कारज में कमी को रैवण दी नीं। जीमा-जूठै पछै मनवार में पान रा बीड़ा आया हा। अफसर अर साब चबड़-चबड़ चाबरै नसरी अर इलाकै रो निरीक्षण करण रो कैयो तो दो जीपां में बानै घुमाया। म्हारो काम बठै आछो कस्योड़े हो। बै चालता गया, मैम साब हरियाली देख, गाढां री पांगरत देख स्याबासी भी दी। आगै भोत बुरी हुई बाऊजी। थोड़ी दूर आगै अफसर अर बांरी घरआली पैदल चाल्या हा। जठै बै उतररै खड़ा हुया बठै सूँ पांवडा दसेक आगै घेर-घुमेर मोटी पेडी रा दस रोहिड़ा ऊभा हा—चीकणाचट। साबणी कैयो, 'सुणो हो के? अबकै कोठी में फर्निचर बणाणो बाकी है नीं, आं रूँखां रो सखरो बणसी। आप इण सारू आनै आदेस देवो। अफसर म्हारलै साब नैं कैयो। साब म्हनै बुलायरै पसवाड़े लेयग्या अर समझायो कै भूरजी, अफसर आं रोहिड़ां री लकड़ी जी में जमा ली है, सो इयां करो कै च्यार रोहिड़ा कटारै फाटका कढा लिया अर सात-आठ दिन में जयपुर भिजवा दिया अर दो रा फाटका म्हारै घरां सीकर भी पुगा दिया। थाँरै जचै तो अेकाध थे भी ले लिया। अफसर जद कैय दियो तो आपां नै हुकम तो मानणो ईज पड़सी, मजबूरी है।'

"बाऊजी, म्हारै सोरको-सो निसरग्यो हो। पगां हेटली जर्मीं जाणै सिरकरै अळ्यां निकळ्यां हुवै। सी-कंपो ताव-सो डील में पसरग्यो हो। म्हैं धीरै-सी बोल्यो, 'साब, जतन सूँ पळ्योड़ा हरिया रूँख है, पाप लागसी।' साब कीं तीखै सुर में चिणख्या, 'पाप तो भूरजी, कद लागसी अर कद को लागै नीं, पण नटस्यां तो औ बाप पकांयत लागसी। रीसां बळ्ठो भारियो जरूर बांध देसी। थे तो बस जित्तो कैयो है बित्तो करो, घणी स्याणप मत झाड़ो। ओ म्हारो आदेस है।'

"जाणो हो बाऊजी, हरियो रूँख बाढणो अर बो ई रोहिड़ो! धरम कथै है कै औ तो बामण-हत्या रो सो करम हुवै। बा बिरम-हत्या-सी म्हारै हाथां हुई ही। फाटका लकड़ा

अफसरां रै घरै पूऱ्या तो दो रुँखां रा फाटका म्हरै घरां भी गया हा। हां, अेक बात आछी हुई कै आपणो औरियो हरियाळी में आखै दफतरां में अगीवाण बण्यो अर मैम साब म्हनै अलायदी स्याबासी अर इनाम भी दियो हो। मन में गिलाणी रो बोझो हो, रात नै सपनां में ई रोहिड़ा ओळमो देवता दीसता हा। साची कैवूं हूं बाऊजी, म्हैं म्हारी नींद बेच 'र जबरो ओजको धार लियो हो। बां कुमाणसां नैं पाप लाग्यो हो कै को लाग्यो नीं पण म्हैं सजा भुगती ही। लिछूडी री मां चाणचक बिना हारी-बीमारी आगलो गेलो पकड़ छोड जांवती रैयी म्हनै सूखै ठूंठ बरगो छोड 'र। म्हैं भाज 'र गुरांसा रा पग झाल मांड 'र काळजै अमूळती बात बताई तो नाथजी महाराज म्हरै सिर पर हाथ फेर धीजो बंधायो। बां कैयो, 'हुयगी जकी तो हुयगी, कोई उपाय कोनी, बस भूरिया! हरिभजन कर अर जीयै जितै रुँख लगा, औ ईज प्रास्ति त है। स्यात् थारी घरआळी री मुगती हुवै, उणरी आतमा सौरी हुवै। थारे आगोतर सुधरै।' सो बाऊजी, पापियां रै मूँढै राम बैठै, बा जुगत करूं हूं। लिछूडी री मां सूं अर बां रेहिड़े रै रुँखां सूं भखावटै-भखावटै नितूंगै रोय-रोय माफी बगसाणै सारू अरज करूं हूं। जाणू हूं, म्हैं अर म्हारा पाप माफी लायक कोनी पण रुँख लगा 'र जमारो सुधारूं हूं।' भूरजी सिसकारो-सो न्हाख धुंई में लकड़ी देवै हा अर म्हैं भी गतागम में पड़ 'र सोचै हो कै आ म्हांटी साच कहाणी कियां कैयी जा सकै है! कै इण साच नैं कहाणी कैय सकां हां?

◆◆





डॉ. मंगत बादल

बुरा जो देखन...

किणी सारू बुरो सोचणै या किणी रो बुरो करणै सूं साम्हीं आळै रो बुरो तो हुवै या नीं हुवै आ तो न्यारी बात है पण जिको बुरो सोचै या किणी रो बुरो करणै री तेवडै उण रो जरूर बुरो हुवै । नकारात्मक चिंतन दुधारी तलवार हुवै बा वार करण वाळै नै भी नुकसाण पुगावै । रहीम जी तो कैवै :

जो तोको कांटा बुवै, ताहि बोव तू फूल ।

तोहि फूल को फूल है, वा को है तिरसूल ॥

कैवण रो मतलब है कै बुराई जद पाछी आवै तो आप रै साथै व्याज लेयनै ई जावै । बियां तो बुराई सारू स्याणा लोग पैली कैय चुक्या है कै जद आप अेक आंगळी उठायनै किणी री बुराई कानी सीध करो तो उण कानी तो अेक आंगळी ई हुवै पण आप रै खुद कानी तीन आंगळ्यां हुवै । म्हें अठे अेक बात पूछणो चावूं कै जद औ ईज कीं करणो है तो सेर नै सवा सेर अर ईट रो जवाब पाथर सूं देणो आद औखाणा कांई घस 'र गूमडै माथै लगावणै सारू चाल्या ? गांधीजी कैया करता कै ना तो कीं बुरो देखो, ना बुरो सुणो अर ना बुरो बोलो । इण बात पर अटल रैवणै सारू बै खुद कनै तीन बांदरां री अेक मूरती राख्या करता जिकी में अेक बांदरै आपरी आंख्यां दूजै कानां अर तीजै रा आपरै मूँडै माथै हाथ धरेड़ा हा । गांधीजी तो संत सुभाव रा मिनख हा । बां आ बात कैय तो दी पण इण सूं बडी गड़बड़ हुयगी । औ बातां अध्यात्म में तो ठीक ही पण समाज में या दुनियादारी रै धरातल माथै इण सूं भ्रस्ट आचरण नै घणो संबल मिल्यो । कबीर कैयग्या है :

कबीरा तेरी झोंपड़ी, गल कटियन के पास ।

जो करे सो ई भरे, तूं क्यूं भया उदास ॥

भगत या संत तो पाड़ोस सूं निरपेक्ष रैय सकै पण आम मिनख रै परिपेक्ष में आ बात कीं कम जचै । जद पाड़ोसी रो घर बळतो हुवै तो आपणो घर कितरी'क देर सलामत रैवैलो ! समाज में तो आ बात भी चालै कै आप जद किणी नै पाप करतां देखो अर बरजो कोनी तो आप भी उण पाप रा भागीदार हो । 'भारतीय दंड संहिता' में तो औं भी लिखेड़ो है कै आप किणी नै अपराध करतां देख्यो है अर उण री खबर सक्षम अधिकारी ताईं नीं करी तो आप भी सजा रा भागी हो । करैलो बो भरैलो ! आ बात ठीक है पण किणी अेक री करणी सूं कितरा लोग दुखी हुय जावै आ बात भी सोचणआली है । मिलावट करण वाला घी-दूध, मसाला या बीजी खाणे-पीणे री चीजां में मिलावट करनै जणे-जणे री सेहत सूं खिलवाड़ करस्यां जावै । बै काईं भुगतैला अर कद भुगतैला आ तो भविस री बात है पण बां री करतूतां सूं जन-जन री सेहत नै जितरो नुकसाण पूगै उण रो खामियाजो कुण भरैलो ? कदे कोई ईमानदार अफसर ऐड़े लोगां नै पकड़ भी लेवै तो बो बडै अफसरां नै रिस्वत देयनै छूट जावै अर जे मुकदमो भी हुययो तो कानूनी प्रक्रिया इतरी लंबी है कै गवाह थक जावै अर दोसी आखिर में बेदाग छूट जावै । बेर्इमान मिनख कोई और गळी ढूँढ सकै । कैवत भी है कै चोर सूं गळियां कैड़ी छानी हुवै ? अठै जे आप औं कैवो कै बुरो ना देखो तो कीकर पार पड़ैली ? बुराई देख अपणावणी कोनी बल्कै उण रो प्रतिकार तो करणो ई चाईजै पण गांधीजी कैवै कै बुरो ना देखो । देख्यां बिना प्रतिकार कीकर हुवैलो ! अेक भांत सूं ओ तो समस्या सूं पलायन हुयो । कबूतर री भांत मिनकी नै साम्हीं बैठी देखनै आंख्यां मीचणी हुयी । इण बात पर चाल 'र देस आज कठै सूं कठै पूग चुक्यो है ? केर्ई दिन पैली अखबार में अेक छोटी-सी खबर छपी । खबर अमरीका री ही । पांच बरस रै बेटै आपरै बाप री पुलिस नै सिकायत करी कै उण यातायात रो नियम तोड़यो है । जांच करीजी तो बात साची ही । इण अपराध रै कारण बाप नै सजा मिली । आपणे तो संगीन अपराध करनै भी अपराधी इण कारण छूट जावै क्यूंकै सबूत मिलै ई कोनी । सिकायत करणालै नै डर लागै । अपराधी किस्म रा लोग आज ऊंचै पदां माथै पूग 'र जनता रो धन लूट्यां जावै । आपां नै काईं है ! आपां नै तो बुरो देखणो ई कोनी ! करैलो बो भरैलो ! भगवान स्सो कीं देखै । उण री निगाह सूं कीं छानो कोनी । उण री लाठी में आवाज कोनी हुवै पण लागै जद आगलो-लारलो सगळो हिसाब चुकतो कर देवै । आं बातां आपणे समाज नै कितरो स्वारथी अर निकम्मो बणा दियो । इण रो औं ईज तो मतलब हुयो कै समाज रै नियमां अर मरजाद नै ताक माथै धर कोई कीं करो आपरै मन री मरजी सूं । सजा तो आखिर में भगवान उणनै दे ई देवैलो । पछै आपां क्यूं बुरा बणां ! कदे-कदे तो म्हनै लागै कै कीं चालाक लोगां रळ 'र ऐड़ा ब्रह्म वाक्य अर औंखाणा घड़-घड़ चला दिया कै

लोग बांरै कुड़कै में फंसगया। समाज में घणा ई लोग इस्या हुवै जिका आपरी आखी जिंदगी में कुकरम करता रैवै अर मौज मारै। बांनै तो कोई सजा मिली कोनी। इन सारू कैय देवै अगोतर में मिलैली तो अगोतर कुण देख्यो है? आ जद पूछां तो जवाब मिलै, शास्त्रां में लिखेड़े हैं। तो सवाल उठै शास्त्र कुण लिख्या है? बांनै लिखणआळा बै ई चालाक लोग तो कोनी। औड़ी बात पूछणियां या कैवणियां नै लोग नास्तिक कैवैला अर शास्त्र विरोधी बतावैला। अठै अेक बात आ भी है कै समाज में रैवण रा भी कीं नियम-कायदा हुंवता हुवैला। बां माथै नीं चाल्यां तो जंगल-राज आवैलो। मौको लागतां ई तकड़ो कमजोर नै गड़प कर जावैलो। आपां देखां कै समाज रा कायदा-कानून नीं मानणै रै कारण आज मिनख निजी रूप सूं लगोलग पतन कानी जावै। बड़े-बड़े स्हैरां में गुंडा, लोगां सूं हफ्ता वसूली करै। कोई बांनै रोकणै री कोसिस करै तो बै उणनै मार देवै या औड़ी सजा देवै कै आगै सूं बीजो मिनख हिम्मत ई कोनी करै। सरे आम बजार में गुंडा हत्या कर देवै पण लोग डरता गवाही देणै सारू त्यार कोनी हुवै। बांरा हाथ इतरा लंबा हुवै कै पुलिस अर प्रसासन सूं डरै ई कोनी। बै जाणै कै समाज इण मामलै में जद ताईं अेकजुट कोनी हुवै बांनै कोई खतरो कोनी। इण कारण ई असामाजिक तत्वां री ताकत अर हिम्मत बध्यां जावै क्यूंकै बै अेकजुट है। ऊपर सूं हेठां ताईं अेक ई सांकळ री कडियां हैं। इण नै आप समाज कैवोला या जंगल-राज! कितरै अचंभै री बात है कै आपरै स्वारथां नै पूरा करण सारू गुंडा तत्व तो अेक हुय सकै पण सरीफ मिनख कोनी हुवै। जंगल में में तो जिनावर भूखो हुवै या खुद नै खतरै में देखै जद ई हमलो करै पण मिनख तो कद काईं कर देवै इण बात रो बेरो ई कोनी लागै। गुंडा लोग समाज में रैवणै रै नियम-कायदां नै आपरी जूती माथै राखै। झूठा, मक्कार, चोर, उचकका धड़ल्लै सूं चोरी कर पछै धनबळ सूं इण कारण ई छूट जावै कै बांरो मुकाबलो करणआळा किणी लफड़ै में कोनी पड़णा चावै। आज असमाजिक तत्वां नै कानून रो डर लागै ई कोनी। समाज में आदर मान हासल करणै सारू औ लोग चंदो-चिट्ठो देयनै समाज रा मुखिया बण बैठै तो आम मिनख काईं सोचैलो। बो तो रिस्वत, भ्रस्टाचार अर अपराध करम नै भी इज्जतआळा काम मानैलो। विचार करण री बात है कै औड़े मामलां में भी लोग अेक क्यूं कोनी हुवै! जिको कीं बुरो दीसै उणनै दूर नई करणै री कोसिस तो नामरदी है। म्हारै शास्त्रां अर लोक रो तो कैवणो है कै बुराई नै देखतां ई सांपं रै सिर री भांत उणनै मसळ देणो चाहीजै। बुरै नै बुराई करतां देख उण नै कीं नीं कैवणो या मूंडो फेर अणदेख्यो करणो उण बुराई नै बढावो देणो है। शास्त्र तो औं भी कैवै कै औड़े पाप नै देख 'र जिको मिनख मून रैवै बो भी उण पाप रो उतरो ई भागीदार हुवै जितरो उण करम नै करणआळो। सुतरमुरग भी तो इणी'ज भांत करै। खुद पर जद संकट आवै तो रेत में सिर घुसा लेवै। साम्हीं मिनकी नै देख कबूतर आंख्यां मीच लेवै। मिनख भी जे इण भांत करण लागण्यो तो उणमें अर सुतरमुरग कै कबूतर में काईं फरक रैय

जावैलो ! दरअसल ऐड़ा लोग अकरमण्य अर लकीर रा फकीर हुवै। बै सोचै बां खातर कोई दूसरो आयनै स्सो कीं कर जावैलो। ऐड़े लोगां रा मानदंड भी दो भांत रा हुवै, काम पड़यां कीं और है काम सस्यां कीं और। म्हैं केई ऐड़ा लोग देख्या है जिका थोड़ो-सो संकट आवतां ई मिंदर कानी भाजै। भला आदमी भगवान आपनै दो-दो हाथ-पग दिया है। दिमाग दियो है। हिमत सूं मुकाबलो करो ! पण नई, मिन्दर कानी भाजैला। काम नीं हुवै तो भगवान नै दोस देवैला। दरअसल आंरो पूजा-पाठ भी अेक भांत सूं सौदाबाजी हुवै। केई ऐड़ा जड़ मिनख हुवै कै बात रै मरम नै तो समझै कोनी अर गधेड़े री पूँछ पकड़यां राखै अर लातां खाबो करै। अेकर कोई महात्मा उपदेस देवै हा। उणां बतायो कै हरेक जीव में भगवान हुवै। अेक मूरख रै आ बात जचगी। बो अेक दिन कठैई जावै हो साम्हीं सूं कोई बिगड़ेड़ो हाथी आवै हो। उणनै अेक मिनख बतायो कै ओ रास्तो छोड़द्यो अर दूर हट जाओ। साम्हीं सूं अेक बिगड़ेल हाथी आवण लागस्यो है। उण पडूतर दियो, ठीक है हाथी भगवान आवै। किण बात रो डर है ? इतरै में हाथी आयग्यो अर उण मिनख नै सूंड सूं उठाय 'र दूर फेंक दियो। घणी चोटां आई। बो पाढो जायनै महात्मा सूं कैवण लाग्यो कै बांरो उपदेस झूठो है। महात्मा उण सूं पूछ्यो कै कांई थांनै किणी चेतायो कोनी कै हाथी आवै ? उण कैयो, “ अेक मिनख बतायो तो हो पण उणरी बात म्हैं मानी कोनी। सुणनै महात्मा हांस 'र बोल्या, “ जद थे मिनख भगवान री बात ना मान हाथी भगवान री मानोला तो थांरै सरीखां साथै इणी 'ज भांत हुवैलो। मिनखां सूं धोखो कर, लूट-पाट कर भगवान रै भोग लगावणियां, मिंदर में जायनै चढावो चढाणियां मन में सोचै कै बांरा पाप धुपग्या। मिंदरां में चढावो अर तीरथां माथै भीड़ इणीज कारण घणी रैवण लागगी। लोग सोचै जियां अफसरां नै रिस्वत देणै सूं स्सो-कीं माफ हुय जावै उणीज भांत गंगा में नहावणै सूं या मिंदर में चढावो चढाणै सूं पाप धुप जावैला। भगवान नै भी लोगां रिस्वतखोर समझ राख्यो है। दरअसल ऐ लोग अपराध-बोध सूं दबेड़ा हुवै। बां रै मन में डर हुवै पिछतावो कोनी।

मिनख नै बुराई रै खिलाफ अेक साथै केई मोरचां माथै लड़णो हुवै। पैलो तो औ ईज कै बो खुद नै बचायां राखै। रिस्वतखोरी, काळा बाजारी, जूओ, दायजो मांगणो, बेहिसाब व्याज वसूली आद ऐड़ी बुराइयां है जिकी छूत रै रोगां री भांत है। लाग्यां पछै घणी अबर्खाई सूं छूटै। ऐ बुराइयां भ्रस्टाचार निरोधक विभाग में भी है। बठै भी मिनख ई है। मिनकी जद दूध री रुखाळी करैली तो अंजाम आपणै सूं छानो कोनी। रहीम जी कैयो भी है :

संगति सुमति न पावहि, पड़े कुमति के धंथ।
राखो मेल्हि कपूर में, हींग न होत सुगंध ॥

बुराई तो बुराई है। उणनै नीं देख आंख मीच्यां बा दूर कोनी हुवै। उणरो मुकाबलो तो करणो ई पड़लो वरना बा बधती जावैली। अठै फैसलो आपां खुद नै करणो है। अेकर म्हें कठैर पढ्यो कै जहांगीर रै राज में अेक चोर पकड़िज्यो। जहांगीर आदेस दियो कै सरेबाजार चौक में खड्यो कर इण रा हाथ काट दिया जावै। उण बगत उणरै दरबार में कोई विदेसी मेहमान आयेडो हो। उण कैयो कै इण भांत तो आपरै राज में अपाहिजां री अेक फौज खड़ी हुय जावैली। अैडा लोग तो पड़खाऊ ई हुवैला। जहांगीर आपरै अेक दरबारी नै हुकम कर्ख्यो कै बो उण मेहमान नै च्यार दिनां सारू गांवां अर स्हैरां में घुमायनै ल्यावै। जहांगीर रै हुकम सूं जद बो उण मेहमान नै च्यार दिनां सारू घुमाय 'र पाढो दरबार में लेयनै आयो तो जहांगीर उणसूं पूछ्यो कै उणनै जनता में कितरा 'क अपाहिज दिख्या। इण बात माथै विदेसी मेहमान जवाब दियो कै अेक भी कोनी दीख्यो। मेहमान रै मूँडै सूं आ बात सुण 'र जहांगीर पडूत्तर दियो कै इण रो मतलब कानून रो डर है। कानून रो मतलब सिरफ सजा देणो ई कोनी हुवै बल्कै मिनख रो सुधार करणो भी हुवै, न्याव सिरफ करणो ई नई बल्कै हुंवतो भी दीखणो चाहीजै, जद ई लोगां में उण रो डर बैठेलो। इण पुराणी घटणा रो वरतमान कानून अर वैवस्था सूं मेल करनै देखल्यो। आपणै सास्त्रां में 'षठे शाठ्येन समाचरेत' भी कैयो गयो है। ओ भी तो नई भूलणो चाहीजै। आपां प्रजातंत्र री नकल कर आपणै देस में वैवस्था तो लागू कर दी पण आथूणै देसां में जठै प्रजातंत्र है बठै कानून कितरी सख्ती सूं लागू हुवै ओ भी तो देखणो चाईजै।

राजनीती में आज कार्ई होवण लागर्ख्यो है म्हनै घणो बतावणै री जरूरत कोनी। राजनीती में जितरो भ्रस्टाचार है उतरो बीजी जग्यां स्यात ई हुवै पण लोगां आंख्यां मीच राखी है। बै बुरो कोनी देखणो चावै। कानून री आंख्यां माथै तो पाटी बांधेडी हुवै ई है। उणरै तो कानां में सुणाणो पडै। जनता भी भ्रस्टाचारी नेतावां नै सबक कोनी सिखावै बल्कै उलटी उण री जी-हजूरी और करै। इण सूं बै खुद नै सही मानण लाग जावै। लोग आ बात कोनी सोचै कै आज जिको पईसा देयनै बोट लेवै बो आगै चाल 'र भ्रस्टाचार क्यूं कोनी करैलो? पुराणै जमानै में जद कोई बुरै धंधै सूं धन कमा लिया करतो तो लोग उण सूं रिस्तेदारी करणै सूं पैली सौ बर सोच्या करता। आज तो धन होणो चाईजै बो कैडै साधनां सूं आयो है इण बात नै कोई कोनी देखै। बुराई रो अंत कदे चोखो कोनी हुवै। आ बात जाणतां थकां भी लोग आंख्यां मीच्यां राखै। सूतै नै तो जगा भी देवां पण जागतै नै कुण जगा सकै! अैडै लोगां नै पुलस अर कानून रै अलावा समाज रो भी कीं डर होणो चाईजै। पुलस, प्रसासन अर नेता मौको लाधतां ई तीन्यूं साथै रळनै जनता नै बेवकूफ बणावै। दरअसल इण रो अेक कारण तो ओ भी है कै आज निजू स्वतंत्रता रै ओळावै समाज रो मिनख पर कीं इधकार ई कोनी रैयो।

आजकाल अेक और प्रवृत्ति देखणै में आवै जिकी घणी खतरनाक है। रिसाणी भीड़, कानून री परवाह ना कर कदे-कदे अपराधी नै पकड़ सामूहिक रूप सूं कूट 'र उणरी

हत्या कर देवै। इण रो सीधो सो अेक मतलब औ ईज है कै जनता नै कानून माथै भरोसो कोनी रैयो। मौजूदा सरकारां, कानून वैवस्था अर नेतावां नै आ अेक भांत री चेतावणी है। पुराणे जमानै में मिनख माथै उणरै समाज रो पूरो नियंत्रण हुया करतो। मिनख समाज सूं डस्या करतो। इण कारण बो कोई भी औड़ो समाज विरोधी काम करणै सूं डरतो जिकै सूं उणनै समाज री अवमानना करणै री सजा भुगतणी पड़े। समाज री नैतिकता रा नियम तो करड़ा हा पण साथै ई लोगां में मिनखपणो भी हो। समाज री पंचायत जद किणी रो होको पाणी बंद कर दिया करती तो उणनै दुबारा समाज में रव्हणै सारू अेडी-चोटी रो जोर लगाणो पड़तो। आज तो हरेक मिनख समाज नै आपरी जूती माथै राखै। मिनख निजी रूप सूं चायै स्वतंत्र हुयग्यो पण समाजिक समरसता में दरार पड़गी अर आ खाई लगोलग चौड़ी हुंवती जावै। इण कारण ई मिनख रै चरित्र रो पतन हुयो है। पुराणे जमानै में समाज मिनख रै चरित्र री रुखाळी कस्या करतो पण आज बै मापदंड बदल्ग्या। गांवां में सामाजिक समरसता कीं जादा हुया करती पण आज तो बठै भी कोई कूवै में भांग घोल्ग्यो। आज किणी नै समझाणै री कोसिस करो तो बो आपनै जूनै विचारां रो बतायनै आपरी मखौल उडावैलो अर पच्छम आळे देसां रा उदाहरण देवैलो। औड़ा लोग कदे बां लोगां री नैतिकता कोनी देखै। देस अर कौम सारू बांरो लगाव अर त्याग कोनी देखै। बै ओ भी कोनी देखै कै बठै रा लोग आपरै देस रै कानून री कितरी इज्जत करै। जद कै आपणै अठै कानून तोड़णआळा बडा लोग ई है। छोटा तो बांरी नकल करै—यथा राजा तथा प्रजा।

आज पुलिस, प्रशासन या नेता सिरफ जन आंदोलन सूं डरै वरना नैतिकता नै तो बां तार-तार कर मे 'ली है। जन आंदोलनां सूं भी नेता लोग आप-आपरा स्वारथ देखनै जुड़े अर पूरा होवतां ई आंदोलन सूं किनारो कर लेवै। लोग खुद नै ठगीजेड़ा मैसूस करै पण बांरो कीं जोर भी तो कोनी चालै। आप इतिहास उठायनै देखल्यो—आजादी पछै रै घणखराक जन आंदोलनां रो औ ईज हाल हुयो है। म्हँ आ कोनी कैवूं कै सगळा नेता या अफसर बेर्इमान है पण अठै ईमानदार है भी कितरा 'क ? जिका है भी बै बेर्इमानां सूं डरता बोलै कोनी। अठै आप कैवता रैवो, करैलो बो ई भरैलो। उण तो आपरो काम काढनै जनता सूं किनारो कर लियो। भरो अब जनता। आज आप सर्वेक्षण करनै देखल्यो आम मिनख बेर्इमान मिलैलो। रेल या बस री टिकट नीं लेणी या जठै भी मौको लाधै, दो-च्यार रुपियां सारू भी बेर्इमानी कर लेणी आज रै मिनख रो चरित्र बण चुक्यो है। इण रो विरोध हुवणो चाईजै पण कुण करै! आज मिनख अर समाज नै इण थितियां माथै विचार करणो चाईजै अर नैतिकता कानी ध्यान देणो चाईजै जद ई कोई देस तरक्की कर सकैलो। संतां, महात्मावां अर महापुरुसां जिकी बातां कैयी है बां माथै संदरभ देखनै विचार करणो जरूरी है, आंधी नकल कस्यां पार कोनी पड़णी।

◆ ◆



डॉ. चेतन स्वामी

दूहा-सोरठा छंद मांय राजस्थानी वीर काव्य

ऋषिभिर-बहुधा गीतं, छन्दोभिर-विविधैः प्रथक् ।
ब्रह्मसूत्र-पदैश-चैव, हेतुमदभिर्-विनिश्चितैः । ।

गीता अध्याय 13/4

रिसी मंतरदिस्था होवै । बानै ई मंतरां रै रचाव सारू घणी भांत रा
छंदां री जरूत पड़ी । रिसियां अनुष्टुप, त्रिष्टुप, बृहती, जगती, अति
जगती आद छंदां मांय मंतरां री रचना करी अर ब्रह्म उपदेस
दिन्हो । छंद री परिभासा होवै—‘छादनात् छन्दः’ । सबदां री ‘छावण’
करणी । अध्यात्म री दीठ सूं ओपमावान सबदां सूं परमात्मा रै
सरूप नै छावणो, सजावणो । छंद भगवान रा रूपाळ्या बस्तर होवै ।
रामायण रो अरथ—रामजी रो घर, चौपाई रो अरथ—रामजी री
चारपाई, दूहो अरथाव पीवण रो दूध । गायत्री मंतर री सिरजणा
करण सूं ई विस्वामित्र जी आखै संसार रा मिंतर बाज्या । औ इतरी
बातां इण वास्तै कै काव्य सारू छंद री घणी मैमा है ।

छंद रै लेखै आपणी आ पवीत मातभौम घणी सिरै रैयी है,
अठै रो काव्य इतरा छंदां मांय कथीज्यो, कै उणरी रीत नै समझण
सारू कई लक्षण ग्रंथां री रचना करणी पड़ी । राजस्थानी रै रीति
ग्रंथ ‘रघुनाथ रूपक’ मांय कवि ‘मंछाराम’ 72 छंदां री सूची
दिन्ही है, पण दूहा रा 4 भेद, छप्पय रा 4 भेद, कुंडलिया रा 5
भेद, नीसाणी रा 12 भेद, दवावैत रा 4 भेद अर वचनिका री 14
रीतां नै रङ्गायां तो 114 भांत रा छंद होवै । अेकला डिंगळ गीत ई
सौ भांत रै छंदां मांय रच्योड़ा है । इसडी मुक्लायत किणी बीजी
भासा कनै कठै ? राजस्थानी रै ‘रघुनाथ रूपक’ अर ‘रघुवर जस

काळू बास, श्रीदूङ्गरगढ़ (बीकानेर) राजस्थान मो. 9461037562

प्रकास' री ज्यूं ई राजस्थानी री सागी बैन गुजराती मांय 'रण पिंगळ' मोटो रीति ग्रंथ है जिण मांय छंदां रा भेद अर रीत बखाण्योड़ी है। इण लूँठै छंद ग्रंथ रा तीन भाग है अर इणरै तीजै खंड मांय डिंगळ रै छंदां रा उदाहरण दियोड़ा है। कवि जिको कीं कैय रैयो है, उण तथ नै बारीकी सूं ओपता-मन कैवण अर कथण री परिपाटी री पालणा करण रो खिसब छंद सूं करीजै। छंद नै बरतां थकां भी कवि आपरी छंद रचण री लकब माथै कोई गीरबो नीं किन्हो अर नीं मोहित होया, तुलसी जैड़ा अमर कवि री विनप्रता अर लुळताऊपणो अंजसजोग है :

भाषाबद्ध करबि मैं सोई। मोरे मन प्रबोध जे होई॥

जरा कुछ बुधि-विवेक बल मेरे। तस कहि हौं हिय हरि के प्रेरे॥

डिंगळ रा कवियां ई आपरै हिवडै री सूझना सूं ई अमर साहित्य री रचना करी। राजस्थानी रो प्रभूत मात्रा मांय रच्योड़े वीर साहित्य डिंगळ गीतां मांय रच्योड़े है। हिन्दी रो वीरगाथा काळ राजस्थानी रै डिंगळ साहित्य रो रिणी है। ईस्वी सन् 1250 सूं 1750 लग रो बगत डिंगळ काळ मानीजै, इण समय घणै उम्दा साहित्य री रचना होई। इण साहित्य मांय विवधता रैयी। भगति, वीर, सिणगार अर लौकिक काव्य रै रूप में अेक मोटो भाखर ऊभो करीज्यो, जिको जूना पोथी भंडारां मांय आज ई आपरै उद्धार री बाट जोय रैयो है। जूनी राजस्थानी मांय जैन साहित्य रै रूप ढाळां, गीत, चौपाई, संधी, स्तवन, फागू, वेलि अर सज्जाय जैड़ो साहित्य, तो चारणी साहित्य रासो, वेलि, रूपक, प्रकास, विलास, झामाल, साको, गुण आद रूप साम्हों आयो। हजारां वीर गीत फुटकर साहित्य रै रूप रचीज्या अर अंग्रेजां रै अठै छैकड़लै प्रवास काळ लग रचीजता रैया। भगती साहित्य रै लेखै रास, चरित्र, सार, प्रकास, गुण, स्तुति, अणभै वाणी अर फुटकर भगती गीतां रै रूप मोटो साहित्य जनोपयोगी बण्यो। सागै-सागै लोकरंजण सारू लोक साहित्य ई गीत, पवाड़ा, गाथा, बातां रै रूप कम नीं रचीज्यो। सतरवैं सईकै री सरुआत मांय इण विविध छंदोमयी साहित्य नै समझण सारू 'पिंगळ सिरोमणि' छंद-सास्तर री रचना चूंडा दधवाड़िया करी।

भारतीय संस्कृति रै मान-मोलां मांय धरा-धरम री रिछ्या अेक मोटो आदर्स है, धीरता, वीरता अर गंभीरता अठै रो जातीय गुण मानीज्यो है। इणी वास्तै रंगरूडै रजथान मांय वीर रो स्तवन बेसी होयो। इयां मानीजतो कै अेक सूरवीर मांय दूजा मानवीय गुण पण सहजां ई मौजूद रैवै। वीर काव्य नै राष्ट्रीय गीरबै रो काव्य कैयीज्यो। औं हर किणनै ई अचंभै मांय नाख सकै कै वीर काव्य रचणियां कवियां मांय उमंग री गाढ कितरै ऊंचै दरजै री रैयी होवैला, कै नूंवो छंद-सास्तर ई साम्हों लाय दिन्हो। फगत अेक वीर गीत सारू सौं सूं बत्ती, अेक-अेक सूं आगळा रमणीय छंद। औंडी मिसाल अवर किणी साहित्य मांय नीं लाधै। राजस्थानी वीर काव्य भाव अर संदेस री दीठ सूं तो सिरै काव्य है ई पण

कलात्मक रचाव अर छंद वैविध्य रै कारण सूं ई घण महताऊ है। राजस्थानी री इण अणमोल धरोड़ रो दोवड़े मैतब है। अेके कानी वीर गीत इतियास रा जीवंत अर प्रमाणिक स्रोत है, तो बीजै कानी काव्य कला री दीठ सूं अेक काळ विसेख रै मनोभावां नै परगासै। राजस्थानी वीर काव्य री केर्द खासियतां है जिण मांय अेक तो आ, कै इण मांय करीजी वीर प्रशस्ति किणी खास राजा, सेनापति कै अधपति री नीं है, जिको जुध मांय जूझ्यो अर आपरो किरतब देखाळ्यो, बो चावै साधारण मिनख ई क्यूं नीं होवै, कवि उणरै गुणां री परख करण मांय लारै नीं सिरक्यो। दूजी खासियत आं गीतां रै रचारां री ही कै बै वीरां रै गुणां रो गान, आंख्यां देख्यै साच रै रूप ई करता। कवि खुद जुध मांय हाजर रैयर भड़ां रे जोधारेपणो जोवता। मौको पड़यां औ कवि खुद ई रीठ बजाड़ण मांय पाछ नीं राखता। कवि असाधारण व्यक्तित्व रा धणी होवता। राज अर समाज दोवां मांय बारंते अणूतो ई सनमान हो। वीर काव्य नै रचण मांय आगीवाणी पांत चारणी कवियां री रैयी। राजस्थानी वीर काव्य रचण री हतौटी नै बां अेक परंपरा रै रूप मांय अंगेजी। इण साहित्य री आपरी अेक त्रिपुटी ही। चतर चारण कवि, डिंगळ जैडी ओजपूरण भासा अर ओपता छंद। तीनूं रळ्यां पछै सलूण गीतां री रचना होवती। ऊंचै दरजै री विद्वता आं कवियां मांय नैसर्गिक रूप सूं मौजूद ही अर पछै पारम्परिक घरू अभ्यास बाँरै खिसब नै ओजूं डिघाई बगसतो। वीर साहित्य रै रचारां सारू डॉ. रामप्रसाद दाधीच री आ उकत ठीक ई है—बै कैवै, “डिंगळ रा मध्यकालीण कवि आपरी ओजस्वी वाणी मांय, जीवण रो बिगाड़ करण वाळी सगतियां नै अर संस्कृति रा दुस्मियां नै ललकार दिन्ही है अर दीन-हीण मानवता नै संजीवणी बगसी है। जात, धरम अर देस सारू माथो देवण वाला नरां-भड़ां री कीरत रा अमर गीत गाया है।” वीर काव्य मांय राजस्थान रै अेक विसेख काळ री सांस्कृतिक, सामाजिक अर राजनीतिक पिछाण पड़तख है। वीर काव्य रचण री परंपरा कोई छह सौ सूं बेसी बरसां लग चाली। नरोत्तम दास स्वामी कैवै, “डिंगळ गीतां री गिणत हजारां मांय है। राजस्थान मांय स्यात ई इस्यो वीर होसी, जिणरी वीरता माथै अेक आधो गीत नीं बण्यो होवै। हजारूं वीरां री चितार नै आं गीतां अमर बणाई राखी।”

राजस्थान री वीर संस्कृति री पिछाण आखै संसार लग पुगावण मांय इण साहित्य रो लूंठो जोगदान है। जीवण मांय जरूरी अर अमिट छाप छोड़नवाला कितरा ई मान-मोल इण साहित्य सूं पोखता पावता रैया। धरा-धरम री आण अर उणरी रुखाल खातर प्राण होमण नै त्यार रैवण रो संदेस देवतो औ साहित्य इण राष्ट्र री छवि नै उजालण रो काम करै। वीर भाव रा आं गीतां री ओपमा श्रीमद्भगवद्गीता सूं करीजी है। बीकानेर रा पृथ्वीराज राठौड़ री मैमां करतां कवि कैवै :

पीथल खित खत्री ध्रम पाल्या
गीता जेम तुहाला गीत

इण वीर साहित्य मांय गुरदै रै डील प्राण फूंकण री चेतणा ही। निरास वीर मांय आस बपरावण री ताकत ही, आसंग तूट्योड़े मांय आसंग बपरावण री सगती ही। वीर काव्य सूं उमंग जगावण रा घणा ई प्रवाद प्रचलित है। आँनै कोई अणूती उकत कैवै तो बो इण धरा अर इणरै सपूत रै मान-मुरतब सूं अजाण है।

डिंगळ गीत परंपरा अेक लांबै बगत ताईं पनपती रैयी, इण वास्तै उणरा कायदा ई रचीजता रैया। दूजै साहित्य मांय जिका कायदा बरतीजै, बीं रो सनमन रचण लग ई रैवै, पण डिंगळ साहित्य नै बांचण सारू ई अेक खास लकब, गळै मांय ओज, फर्फरां मांय दीरघ सांस अर कैवण री हिम्मत अर उछाव री दरकार ही। लय, पंगत, छंद रा द्वाला सूं इण कविताई री ओळख होवती। गीत आखै संसार मांय गाईजण री विधा है, पण डिंगळ गीत अेक खास सैली सूं कैवण री विधा है। हर कोई आं छंदां रो उच्चारण कर लेवै, इसडो मगदूर कठै! इण खास गुण री जाच नीं होवण रै कारण आज औ उत्तम साहित्य अेक लूंठी उपेक्षा रो सिकार है। इणनै बांचण अर रचण सारू अेक मोटी चुणौती झेलणी पड़े। जठै छंद सौ भांत रा है, बठै इणरै उच्चारण अर लय रा ई मृग झंप, ढोल, जंघखोड़े, दोढो, सतखणो, त्रिपंखो, घड़उथळ, विधानीक, चौस, घण कंठ, दुमेळो, अमेळो, अठतालो, अहिबंध, त्रिमेळ, पालवणी, वसंत रमणी, जयवंत जैड़ा छंदगीत है। डिंगळ गीतां नै रूपक कैवण री परंपरा स्यात इणी वास्तै ही। रूपक रो अरथ होवै—सोभा, प्रशंसा। डिंगळ गीतां री रचना सारू जथावां रो ई घणो ध्यान राखणो पड़तो। 21 भांत री जथावां ही जियां—विधानीक, सर, विसर, वरण, अहिगत, आद, अताण, सुध, इधक, सम, नून आद। जथावां रो अेक नांव माखी रीति, पण हो।

छंद री ज्यूं डिंगळ काव्य मांय ‘वैण सगाई’ रो ध्यान राखणो ई घणो जरूरी तथ हो। अेक भांत सूं औ राजस्थानी रो अनुप्रास अलंकार है। वैण सगाई रो सीधो-सरल अरथ होवै—आखरां रो आपसी मेळ। इण मेळ सूं काव्य मांय ओपमा, निखार, लावण्य जाम जावतो। राजस्थानी काव्य मांय ओ अेक सुभ अलंकार मानीजै। वैण सगाई रै वरत्यां, दध आखर ई कीं बिगाड़ नीं कर सकै। दोस रो नास होय जावै।

‘रघुनाथ रूपक’ रा रचारा कवि मंछाराम वैण सगाई सारू कैवै :

वयण सगाई वेश, मिल्यां सांच दोसण मिटै।

किणयक समै कवेस, थपियो सगपण ऊथपै॥

वीर रसावतार सूर्यमल्ल मीसण री पण इण पेटै धारणा ही :

वैण सगाई वाळीयां, पेखीजै रस पोस।

वीर हुतासण बोल में, दीसै हेक न दोस॥

वैण सगाई रा ई तीन भेद होवै, जियां—सबद वैण सगाई, वर्ण वैण सगाई अर अखरोट मित्र वैण सगाई। सबद वैण सगाई रा ई तीन भेद कहीज्या है—आदि मेळ, मध्य

मेल अर अंत मेल। वर्ण वैण सगाई रा पांच भेद है—घण उत्तम, उत्तम, मध्यम वर्ण, अधम वर्ण अर अधमाअधम वर्ण। इणी भांत अखरोट मित्र वैण सगाई रा ई तीन भेद—अधिक अखरोट, सम अखरोट अर न्यून अखरोट है।

डिंगल कवि नै आपरै काव्य नै दोसां सूं बचावणो होवतो। छंद रचना मांय—अंध दोस, छबकाळ दोस, हीण दोस, निनंग दोस, पांगळो दोस, जात विरोध दोस, अपस दोस, नाळच्छेद दोस, पखतूट दोस अर बहरो दोस नांव रा दस दोस गिणीजै।

जूनी राजस्थानी मांय भलाई छंदां री मोकळ्यायत है, पण बेसी साहित्य दूहा-सोरठा, झूलणा, कुंडलिया, नीसाणी, कवित (छप्पय) जियांकला छंदां मांय ई रचीज्यो। इण मांय दूहा-सोरठा मांय बेसी परिमाण मांय साहित्य रचना होई अर ओजूं ई होय रैयी है। पछै प्राकृत मांय गाहा अर उणसूं आगै अपभ्रंश रो छंद दोहा ही राजस्थानी दूहै रूप घण चावो होयो। नरोत्तमदास जी स्वामी रो मानणो है, “राजस्थानी नै दूहो अपभ्रंश सूं बपैती मांय मिल्यो। अपभ्रंश काळ रै छैकड़ जावतां औ छंद साधारण जनता अर विद्वत समाज दोवां मांय सरीसो चावो हो।” दूहा छंद मांय अणूतो ई साहित्य रचीज्यो, जिणरी पूरी रुखाळ ई नीं होय सकी है। नैनो छंद है—कंठा होवण रै कारण इणरी जात्रा खासी लांबी चाली। अणपढ अर विद्वान दोवां मांय अेक जैडे चावो इण वास्तै रैयो कै किणी बात रो पुख्ता दाखलो कै सम्पुष्टि करण खातर हर कोई इणरो उच्चारण करतो रैयो है। राजस्थानी मांय इण छंद रो घणो आघमान होयो। घणकरा रसां मांय, जस जोगै साहित्य री रचना इण छंद मांय होयी। सिणगार, भगती अर वीर साहित्य इण छंद नै रुचि सूं अपणायो।

डिंगल रा बीजा छंद जठै कीं दोरा है, वर्तै दूहो अणपढ सूं अणपढ मानवी रै सोराई सूं समझ मांय आवणवाळो छंद है। फगत च्यार ई चरण मांय दूहो घणी प्रभावी बात नै कथण मांय सखम है। राजस्थानी रा जूना कवियां, बीजा चावै किणी छंदां मांय रचनावां करी, पण कीं उम्दा साहित्य दूहा-सोरठा मांय जरूर कथ्यो। दूहै रै चावैपण नै हरेक कवि भली-भांत जाणतो। औ लोगां रो कंठहार हो।

भलाई दूहो अेक नैनो छंद है, पण इणरो भी आपरो अेक छंद विधान है अर कीं नेम-कायदा है। सिणगार अर लोककाव्य मांय कीं स्वतंत्र ग्रंथां री रचना फगत दूहा छंद मांय होयी। केई कवियां इण छंद मांय सतसइयां री रचना करी। दूहा छंद मांय रच्योडे ‘ढोला मारू रा दूहा’ घणो लोकप्रिय काव्य रैयो है। जूनी बातां मांय ई गद्य नै ओपमा देवण वास्तै बिचाळै-बिचाळै दूहा दिरीज्या है। थोड़े आखरां मांय पूरसल बात कैवण रै गुण कारण भगतीकाळ रा घणकरा कवियां आपरो साहित्य इण मांय रच्यो, आगै रीतिकाळ रा कवि ई आपरै सिणगार साहित्य नै इण छंद मांय घण कोडां मांड्यो। राजस्थान री देस राग मांड मांय तो दूहा ही गाईजै। कैयो जावै कै अपभ्रंश काळ मांय सिद्ध सरहपा सबसूं पैली इणरो प्रयोग आपरै काव्य मांय कर्यो। पछै राजस्थानी मांय आवतां आ परंपरा घणी डिघाई

नै हासल करी । लोक मांय इण्ठे वरतारो घणो सैंठो रैयो है । उत्तराधै-आधूनै राजस्थान मांय बूढ़ी-बडेरियां बीन (दूल्हे) रै ग्यान री परख उण सूं दूहा सुणनै ईज करती । आसंग हास्योड़े वीर नै भी पाछो जुध मांय जावण अर जूझण री प्रेरणा दूहां सुण्यां ई मिलती । दूहो राड़ कराय देवतो तो दूहो जुगां री राड़ मेट मेळ कराय देवतो । दूहै मांय सरावणा होय जावती तो दूहो विसरावण मांय ई आगैड़ी हो । दूहै मांय दिरीजी अमीणी घणी सालती । दूहो अेक कीमिया छंद रैयो है, जिणरी ताकत घणी असरदार कही जा सकै ।

दूहै रै उलटो रूप सोरठो होवै । दूहै रो छैकड़लो चरण पैलै अर पैलड़ो चरण छैकड़ मांय लेवण सूं सोरठो बण जावै ।

राजस्थानी मांय दूहै रा च्यार भेद मान्या जावै ।

दूहो : जिणरै पैलै अर तीजै चरण मांय तेरह-तेरह अर दूजै नै चौथै चरण मांय इग्यारह-इग्यारह मात्रावां होवै । औ मात्रिक छंद है ।

सोरठो : सोरठै री मात्रावां ज्यूं ऊपर बतायो, दूहै सूं उलटी होवै, अरथात इणरै पैलै अर तीजै चरण मांय इग्यारह-इग्यारह मात्रावां अर दूजै अर चौथै चरण मांय तेरह-तेरह मात्रावां होवै । राजस्थानी मांय यूं तो जूना सैंग कवियां दूहा-सोरठा रच्या ई है, पण सोरठां रै लिखारां मांय राजिया (कृपाराम बारठ), किसनिया, बींजरा, नाथिया, भैरिया, मोतिया, चकरिया, नागजी, जेठवा रा सोरठा घणा नामी रैया अर जण-जण रा कंठहार बण्या ।

अंतमेल दूहो (बडो दूहो) : इणरै पैलै अर चौथै चरण मांय इग्यारह-इग्यारह अर दूजै अर तीजै चरण मांय तेरह-तेरह मात्रावां होवै । वीर साहित्य मांय इण बडै दूहै रो बरतारो बेसी रैयो ।

तूंबेरी दूहो (मध्य मेल दूहो) : पैलै अर चौथै चरण मांय तेरह-तेरह अर दूजै अर तीजै चरण मांय इग्यारह-इग्यारह मात्रावां होवै । दूहै रा आं च्यारुं ई भेदां मांय तेरह-इग्यारह री मात्रावां रा हेर-फेर है । बडै दूहै मांय पैलड़ा दोय चरण सोरठै रा अर छैकड़ला दोय चरण दूहै रा होवै । बियां ई तूंबेरी मांय पैलड़ा दोय चरण दूहै रा अर छैकड़ला दोय पद सोरठै रा होवै अर दूजै अर तीजै चरण री तुक मिलाई जावै ।

दूहै रो अेक पांचवों भेद 'खोड़ो दूहो' ई होवै, जिणरो चौथो चरण आधो ई होवै । इण रा उदाहरण कमती मिलै ।

छंद रचती वेळा दध आखर री ख्यांत राखणी पड़ै । दध आखर—अरथाव—बळता-झळता आखर जिका सुभ नीं गिणीजै । फगत वीर साहित्य मांय बरत्या जाय सकै, क्यूंकै बो तो खुद ई ओज अर मरण-मारण री सीख देवणवालो काव्य है । औ अठारह दध आखर इण भांत है—ह, झ, ध, र, घ, न, ख, भ, ग, ड, ठ, थ, ण, द, ल, प, म । औ आखर छंद रचती वेळा पैलीपोत नीं आवणा चाईजै । इणी भांत सुभ-असुभ गणां रो ई काव्य मांय ध्यान राखणो पड़ै । स, र, ज, त औ च्यार असुभ गण है । औ छंद री सरुआत

मांय नीं आवणा चाईजै । म, न, य, भ औ च्यार सुभ गण है । डिंगळ काव्य में सरुआत मंगळाचरण सूं करण रो विधान है । छंद इष्ट रो ध्यान करतां पोळावणो चाईजै ।

वीर रस रा दूहा-सोरठा रचारां मांय, वीर रसावतार सूर्यमल्ल मीसण, हुकमीचंद खिड़िया, कृपाराम खिड़िया, रामनाथ कविया, गोपालदान आसिया, बांकीदास आसिया, स्वरूपदास अर मुरारिदान जैड़ा कवियां री सिरै ठौड़े रैयी है । थोड़े-घणे परिमाण मांय तो डिंगळ रा घणकरा कवियां इण छंद मांय आपरी रचनावां करी ई है । औ साहित्य जितरै लूठै परिमाण मांय रचीज्यो बित्ते लूठै परिमाण मांय छपेर मुंडागै नीं आय सक्यो । इणरै संग्रहण री व्यापक योजना बणनी चाईजती । राजस्थानी मांय इतियास सूं सनमन राखणवाळो डिंगळ रो वीर गीत साहित्य है, बियां ई इतियासूं मैतब राखणवाळो दूहा साहित्य पण है, जियां पाबूजी रा दूहा, अमरसिंघ रा दूहा, लाखै फूलाणी रा दूहा आद । इतियास मांय इसड़ो कोई वीर नीं होयो, जिणरी ‘सर’ करतां किणी गीत कै दूहै री रचना नीं होयी होवै । आऊवा ठाकुर खुशालसिंघ, दुरगादास राठौड़, पत्तो चांपावत, जयमल राठौड़, कल्लो राठौड़, राव कांधळ जिसड़ा भड़ं माथै घणा दूहा कहीज्या ।

वीरां पेटै दूहा-सोरठा साहित्य मांय इतरी भांत री उत्प्रेक्षावां करीजी है कै आं सगळां नै अेकठ बांचेर कोई भी साहित्यप्रेमी घोर अचंभै मांय पड़ जावै अर उणरै मुंडागै वीर भाव रो इतरो सैंठो वितान उघड़ जावै कै बरसां लग उणनै समझण मांय खपता रैवो भलाई । अठै प्रसंगाऊ अेक बात और कैवणी चावां कै धपाई सबद ग्यान बिना डिंगळ रै भांत-भंतीला छंदां मांय कैवटीज्योड़े ग्यान रो टूट्यो-फूट्यो उच्चारण भलाई कर लेवो, उणरी अरथ छटा रो आणंद नीं लियो जा सकै । डिंगळ री अत सिमरधी ई उणरो काळ बणगी ।

दूहै छंद री सखरी महत्ता नै इण भांत जताईजी है :

छोटी तुक रो दूहरो, गीत कवित्त को भूप ।

जैसे हरि बलि छलन को, रच्योज बावन रूप ॥

दूहै री खासियत आ कै इणनै गेय अर कथण दोवूं रूपां मांय बरत्यो जा सकै । भांत-भांत री रागां मांय दूहां नै गाया जाय सकै । डॉ. हरिसिंह राठौड़ रै कथन उणियार, “दूहो अेक इयांकलो छंद है जिको मिनख रै आणंद-उल्लास, आसा, उमंग, राग-रंग, हास-विनोद, विरह-बिछोह, जोग-संजोग अर करुणा-विलाप, ताप सैंग अवसरां माथै हाजर लाई ।” कैवण रो अरथ कै रजथान धरा रै सैंस भावां रै बखाण रो औ सबळ साधन है । राजस्थानी साहित्य रै इण गौरव छंद मांय सूरता अर वीरता रै बिड़द रा कीं औनाण इण भांत है ।

राजस्थान वीर भौम कहीजै । अठै रै वीर मानवी रो इष्ट ई वीर देवी । बीस भुजावां नै धारण करणवाळी देवी जद बाघ री असवारी करै तो उणरै तेज नै झालणो ओखो :

बड़कै डाढ़ वराह, कड़कै पीठ कमट्ठ री ।

धड़कै नाग धराह, बाघ चढ़ै जद वीसहथ्थ ॥

वीरता इण धरा री असल पिछाण है । वीर नारी नै वीरां विहूण कोई ठौड़ ई पसंद नीं है :

मतवाला घूमै नहीं, नंह घायल बरड़ाय ।

बाल सखी उ देसड़ो, भड़ बापड़ा कहाय ॥

इण धरती ऊपरां कायरां री कीं ठौड़ नीं रैयी । कायर अर कपूत रो मेहणो लागै :

कायर कुदत्त कपूत, मेहणो लागै जनमियां ।

सुरो सुदत्त सपूत, नामी इण घर नीपजै ॥

आळसी, क्रितघण अर कुमाणसां नै कुण आदर देवै ? कपूत-सपूत री पारख ई घणी सोरी है—कवि निस्तारो करतां कैवै :

झालर वाज्यां भगतजन, बंब बज्यां रजपूत ।

अतां ऊपर ना उठै, आठूं गांठ कपूत ॥

जुधां रो वरणन करण मांय राजस्थानी कवि रो मन घणो रुच्यो है । पौराणिक पात्रां री लीलावां मांय ई जठै-कठैर्ई किणी सूं जुध लड़ण रो प्रसंग आयग्यो तो कवि उणनै जीवंत जुध प्रसंग रै रूप मांय ई पेस कर्स्यो है । डिंगळ गीतां मांय जोशावरसिंघ रो कह्यो राम-रावण जुध, मुरारिदान बारठ रो क्रिसण रो नाग-दमण, जगा खिड़िया रो क्रिसण-सिसपाल जुध वरणन बांच्यां रुंकटा ऊभा होय जावै ।

जुध लड़्यो तो धरती माथै जावै, पण उणरो असर सुरगां लग होवै :

घनघोरां तोपां घुरै, वजै हाक विकराळ ।

लूहर ले अछरां लखो, कबडी खेलै काळ ॥

तोपां रै मुंडागै ई भड़ इण भांत, निसंक भाव सूं जुध लड़ रैया है, जाणै जुध नीं कबडी रो कोई पैणो मंड्योडो है । इण जुध नै जोय-जोय सुरग री अपछरावां इण मोद सूं लूहर निरत कर रैयी है कै वीर गीत हासल कर इसड़ा भट्ट म्हारो वरण करसी । रजपूत खातर तो जुध खेती रो सो खिसब है । कैयीज्यो कै रजपूत रै घरै जलम लेय'र जुध नीं लड़्यो तो उणरो जलम ई अक्यारथ गयो :

जाया घर रजपूत रै, खगां न थाया खेल ।

जलम बिरथा पाया जिका, सैया ज्यां न सुसेल ॥

वीर रै मन मांय उछाव होवै । आज दुस्मण रै लाय लगाय रजपूती मरजाद री रिछ्या करस्यां :

सहसां खगां सेलड़ा, देसां दुसहां दाह ।

आज करां सह ऊजळी, रजपूती री राह ॥

रजपूती री राह सोरी कठै होवै ? उणनै निरा ई गुणां री रुखाळ करणी पडै :

रण खेती रजपूत री, कब हूं न पीठ धरै ।

देस रुखाळे आपणो, दुखियां पीड़ हरै ॥

वीर पुरुस रण सूं मुंडो मोड़ भाजण री कदै नीं सोचै । बो तो जुध मांय जूझ 'र मरणै
नै आपरो हक समझै । जुध सूं पूठ मोड़ण री बात तो भगवान नै ई नीं रुचै :

उण ही ठांम अजोग, भाजण री मन में भणै ।

आ तो बात संजोग, राम न भावै राजिया ॥

वीर होवै जिको काछ अर वाच रो साचो होवै । वीर मिनख वचन नीं लोपै । प्राण
जावो, पण वचन नीं जावो री आण राखै । इसड़ी वीरां खातर कवि कैवै :

बोलै जितरा बोल, नर जे निरवाहै नहीं ।

त्यां पुरसां रा तोल, कोडी मूँघा करणिया ॥

वचन री रुखाळ जिको नीं करै, उणनै कवि किण भांत बकसै । गोळी हंदा गीत
वाळा शंकरदान सामौर तो रामजी नै अमीणी देवण रो मौको नीं चूकै :

करियोड़ा घण कौल, फेरां रा बै फूटरा ।

मोटी करी मर्खौल, आखै जग में अधपति ॥

अेक प्रति री आद, नह निभाय सकिया निषट ।

जग राखण मरजाद, आप अवतर्या अधपति ॥

राजस्थानी कवि इण वीर भौम रा जाया भड़ां री कीरत रा ई गाण नीं करै, अठै री
वीर नारियां रो बखाण करण मांय ई बो लारै नीं रैवै । नारी नै अबला कैवै । बेटी रै जलम
उपरां कोई उछब नीं मनायो जावै । पण अेक दिन बा वीर छत्राणी आपरी सारथकता
सावित कर देवै । चिता चढण सूं पैली बा आपरै बाबल नै सनेसो भेजतां कैवै :

पंथी अेक संदेसड़ो, बाबल नै कहियाह ।

जायां थाळ न वाजिया, टामक टहटहियाह ॥

वीर नारी नै नीं तो कायर रो सागो सुहावै अर नीं ई कायर कैवावण वाळै बाळक नै
ई जलम देवणो चावै । फेरां री वेळा बा आपरै धणी री परख कर लेवै :

परणंती मैं परखियो, वाचा सुध, बलवंत ।

भड़ पैलां ही भाजसी, कदी न भागै कंत ॥

कवि कैवै :

राठौड़ां री कुळ त्रिया, सीला गरभ न धरंत ।

ज्यां भरतार न भंजणा, ते भंजणा न जणंत ॥

वीर नारी रंडापै री बित्ती परवाह नीं करै । पण कायर धणी सफां खागो लागै । वीर
नारी कैवै :

बो सुहाग खारो लगै, जद कायर भरतार।

रङ्डापो लागै भलो, होय सूर सिरदार॥

आपरै धणी नै अखरावण देवतां कैवै :

पाछा फिर मत झाँकज्यो, पग मत दीज्यो टार।

कट भल जाज्यो खेत में, पण मत आज्यो हार॥

कायर पति तो काईं, पड़ौसी ई चोखा नीं लागै :

नंह पड़ौस कायर नरां, हेली वास सुहाय।

बल्हिहारी उण देसड़े, माथा मोल बिकाय॥

वीर भड़ री थाती वन मांय खुल्लै विचरतै सिंघ जैड़ी होवै। बांरै खातर कवि

कैवै :

सिंघा देस विदेस सम, सिंघां किसा वतन।

सिंघ जिका वन संचरै, वै सिंघां रा वन॥

वीर तो इकोवड़ा ई भला। सिंघा री टोळी नीं होवै। कायरां रो घण काईं काम रो ?

गांधारी सौ जलमिया, कुंतां पांच जणेह।

वै पांचूं रण जीतिया, घणचक काह करेह॥

पांडवां री बात माथै कवि वीर दुरगादास री वीरता रो बखाण करै। बांरै बखाण रा घणा दूहा है। ओहड़ी पड़ियां पांडवां नै अेक समूळो बरस अग्यातवास कर'र काटणो पड़यो, पण दुरगादास तो अेक दिन ई लुक'र नीं काढयो। साम्हीं छाती औरंगजेब सूं लड़तो रैयो :

बारह मासां बीह, पांडव ही रहिया प्रछन।

दुरगो हेको दीह, आछंत रह्यो न आसवत॥

भड़ इतरा अलमस्त कै बानै नीं चाईजै म्हैल दुमेल। कवि इसड़ा जोधां रै आवास वरणन करतां कैवै :

टोटै सरका भींतड़ा, घातै ऊपर घास।

बारीजै भड़ झूंपड़ा, अधपतिया आवास॥

वीर भौम राजस्थान रो जस उणरा सुभागिया सपूतां रै कारण इतियास मांय सदा ई अमर रैयी। कैयो जाय सकै धन जोधा अर धन बांरी कीरत नै कथणवाळा कवेसर। दोवां ई धरती री मरजाद री रुखाळी करी अर आप-आपरै किरतब पालण मांय आगैड़ी रैया। निवण जोधारां—निवण कवेसरां।

◆◆



संग्राम सिंह सोढा

पाणी बिन मिनख पतबायरो

राजस्थान री 'वीर भोग्या वसुधरा' रै रज-रज में पाणीपणो है। वा वीरां रै रगतपान सूं तृप्त है। औ काँई पाणी पीवसी ? इण आसय रै संदरभ मांय क्रांतिकारी कवि शक्तरदान सामौर लिखै :

पाणी रो काँई पियै, रगत पियोड़ी रज्ज।

संकै मन में आ समझ, घन नह बरसै गज्ज॥

मतलब आ कै अठै री जुद्धवीरां री भोम है जिकी रगतपान करै, पछै आ भलां पाणी सूं कियां रंज सकै ? अठै आंख में रातै कस्सै वाळै सपूतां सुजस री चावना में 'स्टै सलूणै सीस' देय पाणी उजवालियो। औँडे अणीपाणी वाळ्यां रा किस्सा छ्यातां में भर्च्या पड़्या है। अठै रै वांकम वाल्है मरदां मन में मिनखापणो, नैणां में सूरापणो अर कांधै माथै कफन राख ई पराक्रम रो परिचै दियो। जियां वीरवर कीरतसिंह सोढा जोधपुर रै संदरभ मांय औ दूहो उल्लेखजोग है :

पाणी रजवट पूर, वाणी चख अम्रत वसै।

सैण हतो रण सूर, किरतै सम दूजो कठै॥

संसार में मानखै सूं मूंघी अर मोवणी कोई चीज नीं है, पण सगळा मिनखां में मिनखपणे री तमीज भी नीं है। वा मिनख पाणीदार री पंगत में नीं गिणीजै।

राजस्थान में पाणी लोही सूं ई घणो मूंघो है, पण पाणी अठै जित्तो गैरो है उत्ती ई गैरी मिनखां नै समझ है। उत्तो ई गैरो अथाह ग्यान भी है। 'जलमभोम री बात' में कैलासदान देवल लिखै :

जळ गहरो गहरी समझा, गहरो ग्यान अथाह ।

मोत्यां मुहंगा नर अठै, वाह वासणी वाह ॥

पाणी-पत राखण सारू अमराण रै सूरमै राणै रतनसिंह पाणी-पणै री प्रीत ई नीं, आन-मान सारू मिटणियै वीरत्व रै गुण नै उजागर कियो । जणा ई अमलां री वेळा उण पाणीदार पुरुष नै रंग दिरीजै :

रतन्न पाणी राखियो, उजवाळियो अमराण ।

अमलां वेळां आपनै, रंग हो सोढा राण ॥

जीवण में पाणी (प्रतिष्ठा) ई सारभूत तत्त्व ई नीं गुण है । इण गुण कारण तो मिनख रो मोल हुवै । जिण भांत जळ सगळी मलीनता नै पवित्र करण वाळी अद्वितीय धरोहर है, बियां ईज पाणी (आब) मिनख री पैठ, पत अर साख नै उजाळण वाळो गुण है, पिछाण है । इण वजह सूं इण गुण नै अंवेर राखणो जरूरी लखावै । इण संदरभ में विद्वान ठाकुर रामसिंह तंवर बगती री इण गति माथै आपरी ऊँडी दीठ रै पाण ठीक ई कैयो है :

मोती रो पाणी उतर, पाढो चढै न फेर ।

बगती री आ ही गती, पाणी राख अंवेर ॥

जिण मिनखां रो पाणी उतर जावै, बाँरै माथै लाख खरच कर्यां ई पाणी नीं चढै । कैवत है कै उतरिया पाणी पहाड़ां नीं चढै । किणी ई मिनख रो किणी ई कारण सूं जे पाणी उतर जावै तो बो मिनख, मिनख री कतार में नीं गिणीजै । पाणीदार मिनख तो मरण समान व्है जावै । इणी साख में कविवर रहीम जी री औ ओळ्यां हामी भरै ईज है :

रहिमन पानी राखिए, बिन पानी सब सून ।

पानी गए न ऊबरै, मोती मानस चून ॥

डिंगळ रै ख्यातनाम कवि लक्ष्मणदान कविया जिण नरां रो पाणी निठ जावै बाँरै जीवण नै अदबायरो कैवतां संको नीं करै । कवि रै सबदां में :

निठियो पाणी ज्यां नरां, मिटियो बांरो मान ।

बो जीवण अदबायरो, छिप छिप काटै छान ॥

सिद्ध सोरठा में ई पाणी-हीणै मिनख री गत नै इण भांत दरसायो है, जिको बांचण जोग है :

मोती पाणी-हीण, कदै नई चित में चढै ।

मिनख बापड़ो दीन, पाणी जद जावै उतर ॥

महाकवि पृथ्वीराज राठौड़ अेक नायिका रै मारफत प्रीत री आन नै पाणी री उपमा देवतां थकां उणां री आबरू नै नारेळां रै ज्यूं राखण री हिदायत देवै :

प्रीतम पाणी आपणो, नारेळां ज्यूं राख ।

कोडी पाणी ऊतरै, चढै न खरच्यां लाख ॥

संत सेऊऱ-सम्मन री अेक परची में अेक छंद मिलै, जिणमें मिनख नै आपरो पाणी कायम ई राखणो है, रत्ती भर पाणी उतरियां पछै बडो मुस्कल व्है :

माथो जाज्यो नाक सूं, नाक न जाज्यो चिक्क ।

रतीइक पाणी ऊतरै, बहुरि चढै नहिं लक्ख ॥

इणीज बात नै लेय 'र किणी स्याणै-समझाणै कवि अंजस जोग यूं उजागर कीनी है :

पाणी में जाय पावलो, लोही व्हैया जा लक्ख ।

काया व्ही जा साबती, नाक न जाजो नक्ख ॥

जिण मिनख रो पौरस नै पाणी (ओज, शौर्य) चल्यो जावै या खतम व्है जावै। छेहली उमर में उणनै मोट्यारपणे री यादां सालती रैवै। इण बाबत ख्यातनांव कवि रायसिंह सांदू मिरगेसर रो औ सोरठो इण भाव री हामी पूरै :

मनमौजां माणीह, जोबन हुंतो जां दिनां ।

पौरस नै पाणीह, मारग लागो मोतिया ॥

जिण मुख माथै पाणी है उणसूं पाणी मांगणो चाईजै। पाणी बायरै मिनख में धूण रो दोय दाणा नीं हुवै। वा कीं नीं पाय सकै। बा तो फगत धरती माथै भार ई समझो :

पाणी वां पै मांगियै, जां मुख पाणी होय ।

पाणी-पाणी बायरो, पाय सकै न कोय ॥

◆ ◆





पाड़ोसण किरायेदारणी

बा म्हारै घर रै आथूणै पासै आळै घर में कोई छह महीनां पैली आई ही। स्याळै रा दिन हा। म्हें बीं नै पैली बार जद देखी तद बा कचरै आळी गाडी में कचरो गेरण बारै निकली ही। म्हें ई कचरो गेरण खातर ई घर सूं बारै आयो हो। बा कचरो नाख'र पाढी घर में बड़ती म्हनै देख'र बारणै में थोड़ी ठैरी अर मेरै कानी तकायो। खैर, बा जादा देर नीं ठैरी अर मायं चली गई पण म्हें बीं री छिब सूं बंध चुक्यो हो। बा ना तो घणी गोरी ही अर ना ई काळी। सलूणो रंग हो। बा भरवैं डील-डोळ री अर आछै कद आळी, फूटरी लुगाई ही। केरई दिनां में ठा पङ्घो कै बा साडी ई पैरै अर सूट भी। बीं पर औं दोनूं पैरावा ई खूब फबता। बीं रै चैरै पर कदै जे उदासी मंडरा भी जावती तो रूप री गरमी सूं उड जावती। बा हर बगत चैळकै निजर आवती। हां, बै स्याळै रा दिन हा अर गळी में निकळणो अर उठणो-बैठणो आम बात ही। म्हें तावड़े कुरसी पर गळी में बैठ्या करतो। बा भी गळी में पूरी निसरती। बीं रो घरधणी अेक मकैनिक हो अर अेक दुकान माथै काम कर्ख्या करतो। बो रोटी लेय'र दिनूं बेगो चल्यो जावतो। आ सारै दिन बैली होवती। म्हारै अगूणै पासैआळो घर आं रै रिस्तेदारां रो हो। रिस्तेदारी ई कोई नजदीकी री ही। बा टेम पास करण सारू बां रै घरां जाया-आया करती। बारै निसरती बगत बा गळी री और बहुवां दांई औलो कोनी कर्ख्या करती। कारण स्यात बीं रो पढ़ी-लिखी होवणो अर खुलै बिच्यार आळी होवणो हो पण बाद में बा ई कीं न कीं औलो करणो सरू कर दियो। कारण स्यात बीं रै रिस्तेदारां रै घर री बूढ़ली ही। बां रै घर री बहुवां रात-दिन धूंधटो कर्ख्या करती। बिण बरज दी होसी। म्हारो बीं सूं मेळ-जोळ ई बात सूं ई कीं जादा होयो कै करोना रै कारण म्हारी दोईती म्हारै कनै रैया करती अर बीं रै दो टाबरां साँग खेल्या करती। कई बार

म्हैं खुद ई आं दो-तीन टाबरां नै लेय 'र पारक जावतो । बठै औ दोनूं-तीनूं टाबर कई देर रमता । म्हारी दोईती बाँ रै घरै जावती अर बांगा टाबर म्हारै घरे कई देर रमता । ओक-दो बार बा म्हारी दोईती रा बाल्ड बाह्या अर चोटी करी । म्हनै आछो लाग्यो । बा जद भी म्हारै बारणै आगैकर लंघती, जरूर झांकती । म्हनै गळी में देख 'र भी जरूर झांक लेवती । बीं री नेह बरसावती आंख्यां घणी आछी लागती । बीं रो आदमी भी आछो परेमी जीव हो । गळी में मिलतो तो राम-रूमी करतो अर अंकल कैय 'र बतवावतो । बा कदे म्हानै कोई सुआल नीं घाल्यो अर तंग ई नीं कर्ख्या । हां अकर जद पाणी री तंगी आई तो बा पाणी रो जरूर पूछ्यो । म्हैं बीं नै जबाब नीं देय 'र कैयो—है तो थोड़ो पण दो-च्यार बाल्टी ले जाओ । पण बा लेय 'र नीं गई । बाद में अक दिन जद बा म्हारै घरै आई तो म्हैं बीं सूं पाणी नीं लेज्याण रो पूछ्यो तो बा बोली—इयां ई सार लियो । म्हारली तरां बीं रो गळी रै और घरां में भी बरताव आछो हो । बा सारै घरां आवती-जावती अर बतवावती । दुराजै आगै खड़ी दूसरी लुगायां बीं नै आप कनै बुला लेवती । स्यात सारा जणा बीं री परसनल्टी सूं मोहीजेड़ा हा । पण बीं री मकान मालकण बीं सूं खुस नीं ही अर बीं नै महीनै भर बाद ई मकान खाली करण रो फरमान सुणा दियो । कारण बतायो कै थारै तो सारलै रिस्तेदारां रै टाबरां रो घड़घसियो रैवै । टाबर मेन गेट खुल्लो छोड देवै अर डांगर बड़ज्यै । जद आ बात म्हैं सुणी तो बडो दुखी हुयो । इत्तै थोड़े दिनां में मकान खाली करण रो कैवणो तो सरासर ज्यादती है! पण म्हैं के कर सकै हो? जे बात गळी में चालती तो म्हैं जरूर बांगे पख लेवतो । पण बात आई-गई होगी । बा बठैई रैवती रैयी । मकान मालकण अर बीं री बोलचाल होवती सुणीजती । मकान मालकण रो आठ-दस महीनां रो पोतो हो । बा इन्नै-बिन्नै खिलावती रैवती । आ ई आपरी गरज नै बीं नै बुलावती अर आपरै टाबरां सागै बिलमावती । म्हैं सोच्यो—बात बणगी लागै पण नीं बात ज्यादा दिन नीं बणी रैयी । गरमी आवतां-आवतां बै केई दिन नीं दीस्या । म्हैं सोच्यो—रिस्तेदारी में कठै न कठै गया होसी । दसेक दिनां बाद दुपारै जद म्हैं गळी में निकळ्यो तो देख्यो कै गळी में अक जोंगा खड़ी है अर बीं मांय अक अलमारी लदी है । मेरो माथो ठणक्यो कै आ जरूर बांरी अलमारी है अर औं तो जावता दीसै! म्हैं घर में आयो अर च्यारदीवारी उपरांकर देख्यो तो बीं रो घरआठो अर अक जणो और कीं समान ऊंचायै बगै हा । बो म्हनै देख 'र कैयो—अंकलजी राम-राम । मेरै मूँडे सूं निकळ्यो—चाल पड़या के तो? बो कैयो—हां! इत्तै में बाँ रै लारै-लारै बा भी दीसी अर बा कैयो—अंकलजी राम-राम । म्हैं कैयो—भली राम-रमी करी थे तो? “के करां तो?” म्हैं बारै निकळ 'र देख्यो—बा सागी बीं जगां खड़ी ही जद म्हैं बीं नै पैली बार देखी ही । बा म्हारली दोईती नै देख 'र आपरै टाबरां नै बीं सूं मिलण सारू बुला लिया । अब देखण नै के हो? म्हैं घर में आयग्यो । बा सारां घरां मिलण-जुलण गई । म्हारै घरै भी आई । म्हारी घरधिराणी बीं नै कैयो—पाड़ेसियां रै आवै तो म्हारै भी आई, कदै सीधी ना लंघ ज्याई । म्हैं सोचै हो—अक लुगाई नैं भी दूसरी फूटरी लुगाई आछी लागै ।

◆ ◆



उपेन्द्र अणु

रई गई रेत ज रेत

जोवनियात छोरी नी
कम्मर वजू आमरा खातो
समनियं नो धुंवाड़े
फैलाईग्यो है
च्यारै मैरै
देखयं हैं अवै
मनख / रुंखड़ं / आंगास/ पृथमी
नै सब
जेम देखाय मुंदू आंधा काच मए

जातर्य एना औजरा मएं
हागड़ो, खाखरो, टेमण्णी,
अरेंड अर अडुवा नं
लीलांचम रुंख

काणू थईग्ये आंगास
फूंफाटा मारै हूरज
जणां थकी
हुकाई गई नंदी
अर रई गई
रेत ज रेत।



कारीगर

पांच तत्व नूँ खोरिया रूपी घोर
मांडै है अद्भुत कारीगर
नती लागतो मांडवा मए ऐने
वधारै टेम
केमकै अणै बणावी दीधं
असंख्यात तरै-तरै न भांत-भांतिकं घोर
कई हैंगड़ा वारं पूँछड़ा वारं
रेंगवा वारं हैंडवा वारं दोडवा वारं
थोड़क काचं तो थोड़क पाकं
थोड़क पौचं तो थोड़क मातं
पण पछै बणाव्यु घणा मन थकी
पूरी हटोटी ऊं
बै पगू घोर
बणावी नै राजी भी थ्यो
पण अतरौज पछतणो भी
खींजणो भी
पण करै हूं
कैनै कहै नै कुण हाम्भरै
अणै बै पोगं वारै तो
बणाब्बा वारा नै भी
भूलावी दीधो
यो तो दौड़े है नै
आंगास मए उड़ै है
मंडारा नूँ नाम लई
हेत्त नै ठगै है
अर ज्यं मली लाय
व्यं चगै है।

◆◆

मयलो

म्हारा मयला माथे जारै भी
बीजा ना अहम नो हथोड़े पड़यो
तो मयलो आकर विकर थईग्यो
जेंम रेत ना वगड़ा मएं
तरस्या वाट मारगू नै
लू नी झापेट लागी।
पण खुसामदी ज्हेर थकी त्यार कीधो घौण
पूरी तागत ऊं पड़यो
तो मयलो लेतराईग्यो
फाटैला सैतरा परतै।
पण सैतरा नै भी
आपणै फाटा व्हेवा नो गुमान है
जारै-जारै भी वैना माथै
बईमानी नी थीगड़ी लागै
तारै-तारै व्हो आपणै आप नै
बोड़ीगामा नो हीरो हमजी फरै
अर ज्युं मलै व्यं चरै
मयलो बापड़े
मन मय नै मन मय हैंजरै।
पण अनै कुण गांठे
मन तो पौमातू फरै है आजकाल
वणी जी हजूरी नी औण्णी ढ्हेरी
मूँडा माथै चलाकी नी चमक चोपड़ी
रूपाळी वाहें
पण व्हा भी अेक दाढ़े
घाघरा ना जेब थकी
कांच काड़ी वताड़ी दै
वैनूं असली रूप अर मयलो
पसियातापो करतो रई जाए
वणं वना टोपी वारं वांदर परतै।

◆◆



भवानीसिंघ राठौड़ 'भावुक'

झाड़का

इण रूपाळी मायड़भोम में
भांत-भंतीला मोवणा रूंखां रै सागै
उग्याया, लांबी अर खांगी सूल्यां आला झाड़का !
रूंखां री ठाडी छांव सूं
उकळता उन्हाळा में
हियो हरखै, काळजो सरसै !
रुत रै परवाण सगळा रूंखां सूं
मीठा गटक फळ बरसै !

पण
आं झाड़कां सूं
करसण करता करसा री
धोती उळझै ।

कदै-कदास ऐ झाड़का
आपसरी में इयांनका उळझै
कै स्याणा-समझाणा मिनख सूं
सुळझायां नीं सुळझीजै !

ऐ ओछा कद रा है...
पण उळझाड़ घणो करै
इणां रो फगत अेक ईज फायदो
डांगर घणा चाव सूं चरै
पण समझाणा जिनावर
इणां रै नैड़कर ई नीं निकळै !



झाड़कां रो सुभाव है—उळझणो
 सुछायां नीं सुछाणो !
 आनै जद करसाणी कस्सी रा झफीड़ लगावै
 जद थोड़ा-सा निचल्यो बैठे
 पण
 सैणां रो बायरो चालतां ईज
 बिरखा री छांटां लागतां ईज
 इणां में पाछी कूंपळां फूटण लागै
 मिनखां रा पेट पाळणी फसलां सूं पैलां
 औ नकटा झाड़का !
 सरणाट करता ऊंचा बधण लागै...
 अर आपरा कु-सुभाव रा कांटां सूं
 आखी जगती नै बींधण लागै।
 साच्याणी !
 आं झाड़कां सूं
 भारत री रूपाळी मनमोवणी भोम
 आंती आयगी
 आंती आयगी, आंती आयगी।

मिनखपणो अर मानखो

मिनखपणो अर मानखो
 कुरब्लवै है, अरड़ावै है, बरड़ावै है
 आजकाल री खबरां अखबार में
 बांच-बांच
 दीखै कोनी
 पूरो सांच ?
 पाणी में पसरती आंच
 गळी-गळी, गांव-गांव
 स्हैर-स्हैर औ ईज दांव
 पूरी धूप, थोड़ी छांव

आथड़तो मानखो
 अलबेली जीयाजूण सूं
 आंख्यां में उळझणां री अणूती पीड़ रो
 लखाव लियां
 ओक-दूजा नै कटखावणी
 निजरां सूं न्हाव्तो !
 मिंदर-मेजीद रा भोंपूआ री
 अटपटी खबरां नै उलटतो-पलटतो
 आपरै मारग बैवणो छोड
 सड़कां माथै बाइक रैलियां
 अर नमाज रा जळसा में
 द्युळसीजतो
 इतरीजतो
 बगनो व्हैगो ?
 इय्यां लखावै
 जाणै
 मिनखपणो अर मानखो
 भारत भोम नै छोड'र
 ओलियन रै सागै
 दूजा ग्रह री सैर करण नै
 सिधायग्यो।
 अर आपणै अठै
 लाय लगायग्यो
 आपस में भिड़ायग्यो
 हाड-मांस रा पूतव्यं नै
 भगवा गमछा
 अर हरी चादरां
 ओढायग्यो
 साच्याणी मिनखपणो अर मानखो
 अठै सूं तैतीसा मनायग्यो।

◆ ◆



डॉ. गौरीशंकर प्रजापत

किन्ना

आखातीज रै अकरै तावडै
रंग-बिरंगै किन्नां सागै
होळी रमतो आभो ।
सिकरै री भांत
उडती कोयल किन्नी
नीलै आभै नै नापण री होड में
गिगन चढती जावै ।
कीं सीधी म्हरै
आंगणै लिपसी खावै
केई खावै हिचका ।
कीं इतरावै
कामणी रै लैरियै री भांत
म्हरै डागळै ।
कठैई तो लड़्या पेच
कीं री आंख्यां हुंती च्यार ।
ताणी रै कारण तणातणी
काटण री दिरीजी धमक्यां ।
कठैई तो चाली कतरणी
कठैई घलिया ढेरिया
छेवट मांय
कीं लूटीजी, केई नै लूटी गई
जकी नीं लूटीजी



बां काट्या गळा
 घरां रा बुझाया चिराग
 केरई किन्नो
 इतरा जिही, इतरा माठा
 कै उडण रो नांव ई नीं लियो
 पङ्घ्या रैया पोर री भांत
 भखारी मांय।
 होळै-होळै दिन आथमग्यो
 आथूणी ओडी मांय
 जकी नीं कटी, ना ई काटीजी
 बै सावळ संभाळ'र राखीजी
 जिणरो ठाह नीं पङ्घ्यो
 भाई-बैनां नै।
 जकी कटी-फटी
 उण मांय सूं केई तो झूलै ही
 बिजली रै तारां मांय
 कीं फंसी झाळ्यां मांय
 कीं अटकी रुंखां माथै
 केई सूनी हेली मांय
 पङ्डी चाटै ही धूड
 कीं तो नाळ्यां मांय पङ्डी
 भुगतै ही आपरा करम।
 कित्ती ई भरियै बजार मांय
 चींथीजै ही पगां सूं।
 अबै तो नीं लाधै
 आपरा जान री बाजी लगा'र
 लूटण वाळा टाबर
 दुबक'र पङ्घ्या है खूणै मांय
 हाथां मांय थाम्यां झुणझुणियो
 जिण मांय बगारै
 आपरो थोथो ग्यान।

टीकल किन्नो

म्हारै आलीजै नै
 मस्तानै स्हैर री
 सूनी हेली रै
 कंगूरा माथै अटक्योडो
 टीकल किन्नो उडीकै
 लूटण आळे छोरां नै।
 कोई तो आवैला
 हाथां मांय लियां बांस
 आगै बंध्योडै छडै मांय
 उळझाय 'र म्हनै
 आपरै मांय
 करैला मुगत
 इण सूनी हेली री
 मुंडेर सूं।
 पण किणनै फुरसत है आज
 आखो स्हैर लाग्योडो है
 बचावण नै
 आप-आपरा प्राण।
 काटण नै लाग्योडो है
 अेक-दूजै रो किन्नो
 समेटै आप-आपरी लटाई
 बणावै मांय रा मांय गेड़ा
 खेंचण नै लाग्योडो है
 अेक-दूजै रै हाथां मांय सूं डोर।
 देख 'र इण खींचाताणी नै
 फोड़ लियो आपरो माथो
 टीकल किन्नो
 खाय-खाय 'र भचीड़
 सूनी हेली री भींतां सूं।

◆◆




गीतिका पालावत कविया

सात समदरां पार सूं

आखर-आखर जोड़ लिखूं हूं
बातां मन री
ओढ़ूं रा कागदिया बाचूं सैंग समै रा
बाल्पणै सूं अजलग वाला
इणी जुगत में
म्हारे मन रै भावां सागै
तोडूं इण जगती रा जाला ।

म्हारी धर वा
जठै खेजड़ी रमती ही
धोरां रै सागै
जठै रेत रा रंग
आंखियां माय भरीजै
जठै मोरिया
प्रीत जतावै बादल सागै ।

लिखूं आज म्हैं
सात समदरां पार सूं
कर्म मन री बातां
धोरां धरती री ओढ़ूं
रै सागै रमती
म्हारे मन-चेतै में गमती ।



लुकिंस रोड, बेंटलेग, मेलबॉर्न, आस्ट्रेलिया मो. 7838880623

मन रा भाव अजै ई जागै मन में
बातां बिलमावै ओळूं नै
अर म्हें मांडूं
घणै हेत सूं मन री बातां इण कागद माथै
सात समदरां पार सूं।

सांसां रो साच

आ काया पंचभूतां री
नीं जाण सकै
काया सूं बारै री बातां
इण जगत री
कै जीव जात री
काया तो माटी री होवै
माटी तो माटी नै जोवै।
पवन अर अगन
अकास अर जल
माटी रै सागै गूंथीजै
ऐ पांचूं मिल 'र
बण जावै अेक काया
इणसूं जुड़ जावै
सांसां रो साच,
जितरै रैवै औ मेल
जीव रमतो रैवै
काया रै इण आंगणियै।
झीणी झारी तांतां
सांसां री बाजै
काया रै सागै रमती रैवै
जीव री सांसां
चालै जितै ई
काया इण जगत नैं
खुद री सगळी बातां कैवै।

♦ ♦



अरुणा अभय शर्मा

आवो, आपां अन्न बचावां

राजा बेटा रो ब्यांव रचायो
धन्ना सेठ नगर जिमायो
बण-ठण सगळा आय रैया है
लावा ले-लै जीम रैया है
नूंवी तरै रो जीमण औ दीसै
हलवा-पूड़ी अठै न दीसै
इब तो टाबर पिञ्जा खावै
चाउमीन आंगळ्यां में नाचै
तरै-तरै री सजी स्यालां
पंगत में बैठ इब म्हे नीं जीमां
ऊभा-ऊभा, रमता-फिरता
जीमण में म्हे स्यान हां समझां
भर-भर थाळी, पकवान हां लावां
आधो खावां, आधो ढोळां
जो ना भावै चीज कोई तो
डस्टबीन में म्हे पधरावां
थोड़ो ई विचार न आवै
अन्नदेव है, भूखा सोवै
इब तो भीतर झांको मिनखां
इब तो थोड़ो सोचो मिनखां
मिनख जमारो इब तो सुधारां
आवो ! मिल इब सगळा विचारां
आवो ! आपां अन्न बचावां ।



के-15, गली नं. 5, डिफेंस लेब रोड, देवी भवन होटलरै कर्ने, रातानाडा जोधपुर (राज.) मो. 8875015952

ग्यान री गोठ

ग्यान गोठ में बैठां जद
मूँडो राखणो बंद
जे मूँडो खुलो रैयो
अर कान जे राख्या बंद
ग्यानी ग्यान दे घरां जासी
अर थूं रैय जासी बंद
मनड़ा रो पिंजरो खोल जद
बैठैला ग्यानियां संग
खिलसी रूं-रूं तन-मन रा सगळा
अर आंख्यां होसी बंद
होसी आंख्यां जद बंद
खुलैला, बुद्धि रा पट
भरसी ग्यान भंडारा
बणैला मिनख थूं चटपट ।

गोरी

गोरी री काया गोरी
पिव रै मन रो है उजियारो
कामणगारी गोरी रो पण
कामण करै घर में अंधारो
हाथ पकड़ बन्ना उण गोरी रो
करै आंगणै जो उजियारो ।
करै आंगणै उजियारो
बहावै प्रेम रा व्हाव्या
शिक्षा अर ग्यान सूं गोरी बा तो
करै सगळै गांव में उजियारो ।
करै गांव उजियारो
जिमावै प्रेम सूं रोटी
छोड मत हाथ बन्ना उण गोरी रो
मनड़ा री जकी नीं है खोटी ।

◆ ◆



डॉ. प्रमिला चारण

गठजोड़े

काती री पूनम अर धीव रो व्यांव

धरा री धीव अर आभै रै चांद रो
गठजोड़े जुड़यो
जुड़या धीव रा लेख
अजब मेळ'र गजब संजोग
बरसां पैली री बात
डागळै री ऊंची मेड़ी
अर मेड़ी री बारी मांयकर

परण्यै फेरै पैली बार
आंखड़ल्यां में गैरो सुरमो सार
चुड़ला री ओट सूं
बा चांद रो दरसाव कीन्हो

लोक रै गीतां रो लाप
वीरम री झीणी डीगी मांड राग में
सुहागण रै रातीजोगां रै
गीतां री गूंज अर सायबा री बाट

ओछी रातां अर मोटा दिन
आगलै दिन फेरुं रात री उडीक
चांद री चावना अर चांद री ई दीठ



कद रात पड़ै अर
कद बारी मांयकर चांद रो
दरसाव व्है...
धीव री तिरछना...

बारै चांद रो अर
मेड़ी मांय लालटेण रो उजीतो
कित्तोक रात अर कित्तोक सुपनो

चांद रो ढलणो बाई नै
घणो खारो लागतो
क्यूंकै चांद रै उजीतै में
बा आपरै हाथां री
मैंदी रो रंग जोवती
कै कित्तोक रंग आयो !
आंगक्कां रा पैरवा धी में करती
तेल री मैंदी सांवली रचती
अर धी री मैंदी राती-कुसुंबी रंग

कुसुंबी रंग प्रेम रो अर
रातो रंग ई प्रेम रो
सांवलो बिरह अर बिछोव रो

धीव रा धरम धीरा हा
अर लारलै जलम रो पुन्र
कै उणरै भाग में
प्रीतम रै रूप में चांद रो ईज लिख्योड़े...

बैमाता रा लेख
टाळ्यां टळै अर कोई बाळ्यां बळै
उणनै चांद री लवना लागी

नई, औड़ो जलम बारम्बार
अमरापुर म्हारो सासरो अर
प्रीतम रो अमर सवाग
सुहागरात में चांद री दीठ अर
चांद री लगन
दीठो जैड़ो तूठो

पूनम पछै हर रात
चांद री कला घटरै
घटतां-घटतां छाई
अमावस री घोर अंधारी रैण
धीव रा भाग धीव रै भेला

प्रेम चौकटे ऊंची मेड़ी
जीवण रा दिन चार
भवसागर सुं उतरी पार
जिणरी अणंत ऊंडी धार

गगन झरोखै बैठ सुहागण
झालो दीञ्जै अे
हेली म्हारी निरभै रहीञ्जै अे

मां म्हानै अमरापुर परणाय रे
अमर सुहागण कीन्ही
धीव रो भाग रे अमावस रो अभाग।

◆ ◆





योगेश यथार्थ

आयो खेत बसंत

रंग बसंती गेहूं को, कनक केस ल्या धार।
लारां-लारां नाचस्या, चणा चै'क पै आ'र॥

डोडा जाडो दूध छै, आफू मद में चूर।
धण्यां'र अळस्यां झूल 'री, जोबन में भरपूर॥

च्यारूं मेरस्यां फैलस्यो, सरस्सूं रो मकरन्द।
ऊंडा-ऊंडा बैठस्या, मूळा सक्करकन्द॥

भौरलाठ भी लाठ बण, चमकावै छै फूल।
बैंगण ऊंधा झूलस्या, चुभै बदन में सूळ॥

लाल टमैटर सरम सूं, घणी प्याज कै औंठ।
मरच्यां मन मसोस रयी, लहसण कै मन गैंठ॥

मूळी जायी मोगरी, मूँडै चमक्यो नूर।
मनभावण मनमोवणी, मैथी मटर मस्यूर॥

कामणगारी कामण्यां, कामणगारा कन्त।
यूं कामण नै लार ले, आयो खेत बसंत॥

◆ ◆

अध्यक्ष, करसो खेत खलांण, ग्रामीण साहित्य संस्कृति संवृद्धन समिति ढोटी, शाखा-सरकन्या, जिला-बारां (राज.)
मो. 9928547927



मत कर आतमघात

कायर उठ संघर्ष कर, तन देवण नह तंत ।
 पतझड़े रै झड़ियां पछै, बहुरि आय बसंत ॥
 अंधकार आतप हुवै, मघवा बरसै मेह ।
 ऊंडी सोच विचार उर, दुरलभ मानव देह ॥
 लाख जनम तन लांघियो, पुनि मानव तन पात ।
 बिरथा देह बिगाड़ नै, कर मत आतमघात ॥
 सुख-दुख इण संसार में, है विधना रै हाथ ।
 दुरदिन सनमुख देखनै, मत कर आतमघात ॥
 सदा नहीं संकट समय, सदा नहीं बरसात ।
 काळ रहै नहीं थिर कदै, कर मत आतमघात ॥
 सरमै पीहर सासरो, लाजै परिजन लोक ।
 दाग मिटै नह दाग सूँ, सब जीवणभर सोक ॥
 परमेसर पूरण प्रभु, इणरै घर इंसाफ ।
 करै कूच बिन कायदै, मालिक करै न माफ ॥
 सुख माया घर संचरै, हंसी-खुसी जद होत ।
 घर आवै विपदा घणी, मरै जिका बिन मौत ॥
 दिल राख देसाण पत, मन रट करनी मात ।
 भली करै सब भगवत्ती, बण जावै सह बात ॥
 तीन लोक तारण तरण, नमो त्रिलोकी नाथ ।
 आयो कष्ट उबारलै, कर मत आतमघाल ॥
 काबू करणो क्रोध नै, मन रखणो मजबूत ।
 नैड़ा कर नह नीसरै, जिण पासै जमूदत ॥

◆ ◆

से. नि. आरपीएस, मां भगवती नगर, मकान नं. 84, बालसमंद रोड, जोधपुर मो. 9460819909



बनवारी 'खामोश' चूरुवी

चार गजलां

(अेक)

सुदियां-सुदियां जाग भायला दिनूंगै
सागी भागम-भाग भायला दिनूंगै

रोठ्यां माथै लाग भायला दिनूंगै
लूण-मिरच रो साग भायला दिनूंगै

नांव मती ले सिंझ्या पैलां थमणै रो
काम पड़्या बेथाग भायला दिनूंगै

फगत रात रा बासा घरां मजूरां रा
उडती चीडी-काग भायला दिनूंगै

अबखायां रै पाणी में तिरता सुपन्ह
है साबण रा झाग भायला दिनूंगै

मन कागद रै खेतां रो अणथक हाळी
तन थाक्योडी डाग भायला दिनूंगै

सावणियै री रुत रातां री अपणायक्त
जिनगी दीपक-राग भायला दिनूंगै



(दोय)

भीतर बहतो निरमल पाणी कुण जाणै
इब संतां री डूँगी बाणी कुण जाणै

कुण सुलझावै जूण-जेवडी रा आंटा
जींवत जी नै लाय लगाणी कुण जाणै

लोही नै स्याही रो रूप बणावै कुण
हिडै-कागद कलम चलाणी कुण जाणै

मनडै री आंख्यां पर माया री पाटी
सांसां री फिरती घाणी नै कुण जाणै

धीरजवाही रा ठंडा छांटा देकर
बिगडी-बिगडी बात बणाणी कुण जाणै

मरजी रा नूंवा खुल्ला चौगानां में
मरजादा री सींव पुराणी कुण जाणै

अंतस रै टीबां पर ढाणी कुण बांधै
ताती-ताती धूडू उडाणी कुण जाणै

(तीन)

मन लागै नीं दुनियां मांय अगूण बेसी
उतरादै, दिखणादै नीं आथूण बेसी

फेरूं जलम लेकर आऊं क्यूं भोम माथै
अेक फगत जिनगी लागै जद जूण बेसी

हिवडै मांय घणा घुरबाळा दरद हाळा
लोगां री बातां बुरकावै लूण बेसी

हाथ पसारी मति ना जिवडू इयान साम्हीं
चौथाई देकर मांगैली पूण बेसी

रत्ती, तोळा, मासा, सेर अधूण बेसी
खोटी होवै मांय हियै रै दू'ण बेसी

तिरियां-मिरियां नीं होवै लोभी रा कोठा
करम-कुवै माथै भूंवीजै भूण बेसी

जी सोराई सूं मायत जद घर रै माईं
चौखट-चौखट कींकर मांडै सूण बेसी

(चार)

बिरखा बरसै, मांय नहावै टाबरिया
नाळा-खाळा खुद बण जावै टाबरिया

छुपम-छुपाई खेलण लागै चन्नरमा
बादलियां नै जद सरकावै टाबरिया

भोळी-ढाळी बातां री पटरी माथै
बाळपणै री रेल चलावै टाबरिया

सुपनां माईं कंचा-गोळी खेलण नै
तारां छायी रात बिछावै टाबरिया

मायत सूं स्याणप री चिकणी तख्ती पर
बांका-चूंका आंक मंडावै टाबरिया

हाथ पकडू कर सौरम रो फूलां ताणी
तितली बणकर उडता जावै टाबरिया

खेल-खिलौणां साथै सिंझ्या सामट कर
सिरहाणै लेकर सो जावै टाबरिया

◆ ◆



मोहन पुरी

आंख्यां : तीन गजलां

(अेक)

आंख्यां भेंट उळळगी आंख्यां
समदर देख गुदळगी आंख्यां

पापाई रा पग लांबा कर
हिवडै झांक संभळगी आंख्यां

बाट उडीकै ही मेहा री
पाणी पी'र कुमळगी आंख्यां


जगरो चेता रावा माहीं
आपुंआप कजळगी आंख्यां

भूंवै मनडो रोही-रोही
सुपनां ताळ डकळगी आंख्यां

बांथां लेवै बाच्या देवै
सेजां आण फिसळगी आंख्यां

करलै दीठ हथाई 'मोहन'
काजळ घाल उजळगी आंख्यां

◆ ◆



(दोय)

बिणजारी ज्यूं बरणी आंख्यां
आंख्यां बैठ सुमरणी आंख्यां

गाडा भर-भर सुख मोलावै
सायब बाथां भरणी आंख्यां

पळकां तेरै काजळ ऊँडो
बण जावै बैतणी आंख्यां

बन मांही बैठी सीता नै
लागै राम नसरणी आंख्यां

निज सुपनां री चिण दै मेड़ी
चेजारा री करणी आंख्यां

आपूं आप उडै गिगनारां
धीजो धास्यो धरणी आंख्यां

फेरा खावै चंवरियां मांही
आटै-साटै परणी आंख्यां

सरवर मांही कंवळ खिला दै
थळ जिनगाणी तरणी आंख्यां

मनां-मनां क्यूं मुळकै 'मोहन'
अंतस झळमळ करणी आंख्यां

◆◆

(तीन)

जद-जद देखी काळी आंख्यां
आभै प्रीत उछाळी आंख्यां

पाप पणी धर जावै मनडै
झूठी, कपटी, जाळी आंख्यां

राती-माती काजळ करनै
पैरै रोज खुगांळी आंख्यां

टीबां-टीबां पिव दरसण नै
भाजै पाळी पाळी आंख्यां

पनवाड़ो लै मिंदर जाती
निरखै पूजा थाळी आंख्यां

हरी बाजरी सत सिट्टां रो
करती खेत रुखाळी आंख्यां

मद पावै नित भर-भर प्याला
निरखै बैठ कलाळी आंख्यां

पलकां पलकां सुपना चिणती
हरखै दै दै ताळी आंख्यां

तंगा खावै मन लोभीड़ो
आंख्यां रैण उजाळी आंख्यां

मीरां री भगती नै 'मोहन'
थारै सांचां ढाळी आंख्यां


◆◆



कल्याण गुर्जर 'कल्याण'

भायला

हंसी उडा मत जाण भायला
राख कायदो काण भायला
बातां बातां में व्है जावै
अणचाया घमसाण भायला
जीं नै खायां बुद उपजै है
असो राखजै खाण भायला
सगपण जाणी जगां करीज्यो
पाणी पीवो छाण भायला
दूर असां सूं रह ज्यो जीवै
नकटाई कै पाण भायला
मेल मिलाप भलो रैवै है
खोटी खींचाताण भायला
विपत पङ्चां मन धीरज धारो
चूको मत औसाण भायला
गरब करस्या वांका जा देखो
ऊठचा सै कमठाण भायला
टिक्या राखणा पग धरती पर
क्यूं बिन पांख उडाण भायला
कदै सांच नै आंच न आवै
कथगा वेद पुराण भायला
परहित सूं 'कल्याण' करस्यां पछ
सोवो खूंटी ताण भायला



◆ ◆

मु. पो. मनोहरपुर, जयपुर (राजस्थान) मो. 9928878248



डॉ. अनिता वर्मा

बीस हाइकु

(1)

मन बेचैन
समझाऊं घणो म्हँ
समझै कोनी ।

(5)

उमग्यो मन
धारवा परीत रा
बेह निकळ्या ।

(2)

रुख री पांत
घणी रूपाळी लागै
सीख देवै सबनै

(6)

मन गोरी रो
कळियां ज्यूं चटखै
सावण आयो ।

(3)

ओळमो थांरो
अंतस उलझाण
काई उपाय !

(7)

निसा गोरडी
फँके ओस रा मोती
किरणां बीणै ।

(4)

घणी रूपाळी
छिब है थारी बस
देखता रैवां ।

(8)

बावळे मन
हिरण ज्यूं फरै छै
मरीचिका म्हँ !

(9)

चांद सो मूँडो
लुभावै सब तांई
मन मोवणो ।

(15)

रैण बिछडै
आ मिल्या परभात
चकवा-चकवी ।

(10)

हींडण लागी
ल्यो सगळी भायल्यां
सावण आयो ।

(16)

मिरगानैणी
निजर बाण फेंक्यो
धस्यो काळजै ।

(11)

गिरगिट ज्यूं
आजकाल मिनख
रंग बदलै ।

(17)

नेह रो रंग
अंतस हळचळ
मन बेचैन ।

(12)

बळबळती
दफैर पग दाजै
उभाणा पांव ।

(18)

मन री पीडै
उथळ-पुथळ छै
कुण समझै !

(13)

सूख्या रुंखड़ा
बादळ रुसग्या छै
अकाळ दीखै ।

(19)

फूल खिलस्या
मौसम बदल्यां
मनड़ो राजी ।

(14)

रंभाती गायां
गोधूली बगत छै
बाछड़ा कूदै ।

(20)

पुन्यूं रो चांद
मनमोवणो लागै
ओळ्यूं आवै छै ।

◆ ◆



मोनिका गौड़

दस हाइकु

(1)

खाटा बोरिया
चरपरी आमली
माऊ रा हाका

(6)

खाजा खजली
कढावणी रो दूध
बातां रुळगी।

(2)

रेसम रेत
माथै मधरी छात
बाबोसा म्हारा

(7)

सांझो तंदूर
खेतां होवती ल्हास
गुडती गाडी।

(3)

बंदरवाळ
हिंगळू राच्या हाथ
ओळ्यू आंख में।

(8)

छात चौबाशा
मुळकतो आंगणो
भरता डुस्का।

(4)

पाणी री बारी
कड़ी खड़कावणौ
आंगणै भीतां।

(9)

डोर किनका
सतोळियो कबड्डी
ऐ कैंडीक्रश।

(5)

राली गूदडी
जाजम तिरपाळ
फ्लोरिंग हेठै।

(10)

गिणिया सिक्का
कळदारी खणक
क्रेडिट कार्ड।

◆ ◆

नवल सागर, माजीसा री बाड़ी, बीकानेर (राज.) मो. 9799094548



राजकुमार जैन 'राजन'

फूल

हंसै अर हंसावै फूल
मस्ती में लहरावै फूल
नूईं ताजगी भीतर भरदै
मनड़े घणो लुभावै फूल

कांटा में भी खिलता रैवै
हंसणो म्हानै सिखावै फूल
हंसता-हंसता ज्यांन लुटावै
माटी नै महकावै फूल

प्रकृति री सुंदरता में
च्यारूं चांद लगावै फूल
तितली साथै लुकम छिपाई
भंवरां साथै गावै फूल

सियाळो-उन्हाळो सैवै
रोजीना मुळकावै फूल
होवै देव चरणां में अर्पित
जीवण सफळ बणावै फूल

◆ ◆

रोबोट

रोबोट मन्त्रै दिराक्यो राम
आपोआपी हो ज्यावै काम
बेली जैड़ो साथै रैवै
'रोबू' उणरो राखूं नाम

भारी भरकम बस्तो मेरो
स्कूल बो ई ले ज्यावैगो
होमवर्क फुरती सूं करनै
म्हारै साथै खेलण आवैगो

रोबो कह्यां करैगो अब सूं
घर भर रो सगळो ई काम
मम्मी नै भी मिल ज्यासी
थोड़ो-घणो अब तो आराम

जब भी बोर होऊंगा मैं तद
उण सूं चोखी बात करूंगा
बगीचा री देखरेख करैगो
म्हैं साथै सैयोग करूंगा

◆ ◆

आमां री सौवणी सौरम नै
ऐड़ो जबरो रंग जमायो
सब्जी लेवण गयो हो भालू
आम लेय'र घर आयो

याद नीं रैया आलू उणनै
याद नीं रैयी गोभी
फीकी लागी आमां रै आगै
तरकारी ही जो भी

बादामी मीठा आमां रो
रस पीयो गाढो-गाढो
आमरस सूं आगै नीं है
कोई दूजो स्वाद ठाडो

गर्मी रै मौसम रो राजा
फल है अजब-अनूठो
सगवा टाबर पियो प्रेम सूं
आमां रो रस चोखो मीठो

◆◆



सदाचार अपणावां

मुसीबत सूं नीं घबरावां
आगै ई आगै बधता जावां
सदाचार अपणा'र सगवा
लाडे सर बण ज्यावां

कदी नी ल्यावां झूठ काळजै
मैणत सूं ना मूँडो मोडां
भेदभाव रा बंधण तोड़'र
सब सूं सांचो नातो जोड़ां

स्वारथ सूं जळज्यावै जीवण
मैलो हो ज्यावै है तन-मन
प्यार मोकवो सब में बांटां
समझां इण नै मोटो धन

श्रद्धा-सेवा सूं मन हरल्यां
खुसियां सूं भरल्यां गागर
बण'र नम्र दया रा सागर
जग में नाम करस्यां उजागर

◆◆

मीठी वाणी में जादू है
सब में प्रीत जगावै
झगड़ा-टंटा, बैर भुलावै
प्रेम रो रस बरसावै

कड़ी बोली रै कारण
कागड़लो कांकर खावै
मीठी बोली रै जादू सूं
कोयल तो आदर पावै

रिपियो-पीसो चूक ज्यावै
बोली तो साथ निभावै
आपरे घर सूं दूर देस में
सब नै मिंत बणावै

हार्घोड़ा जीवण में जैड़ा
नूंचो जोस आ ल्यावै
मीठी वाणी में ऐड़ो जादू
सब इणनै अपणावै

◆◆



इनलैण्ड सोमानी फाउण्डेशन कानीं सून निर्मित संस्था द्वारा लोक निजर उच्छब
दिनांक 29 मार्च, 2021 री यादां



महावीर माली, राष्ट्रभाषा हिन्दी प्रचार समिति, श्रीडुँगरगढ़ (राज.)
खातार मर्हिष प्रिण्टर्स, श्रीडुँगरगढ़ में छारी

खाता नांब : RAJASTHALI
बैंक : बैंक ऑफ इंडिया, श्रीडुँगरगढ़
खाता सं. : 746210110001995
IFSC : BKID 0007462

Website : <http://rbhpsdungargarh.com>